

射

鷹

樓

詩

話

射鷹樓詩話卷九

侯官林昌彝惠常輯

科名晚達近代如寶應王樓村殿撰式丹年六十方得鄉榜
長洲沈歸愚尚書德潛年六十六方得鄉榜曲阜桂冬卉
大令積五十五登第作詩云蛾眉十五嫁王孫老女粧成
也倚門莫誦樂遊原上句夕陽空自怨黃昏自注云陳大
士五十登第有句云夕陽無限好只是近黃昏此皆晚年
登科之一掌故也

臨川湯茗孫舍人

儲璠

著有布帆無恙草三卷忍冬小草二

卷舍人夙具天才髫年名噪海內

嘉慶庚午元辛未進士

解官中翰極

爲臺閣諸鉅公所賞凡進

御文字多出其手以偶失權

貴歡十餘年不得薦擢鬱鬱成痼疾道光己丑移疾歸尋

沒於家年四十餘詩筆跌宕酣嬉不可一世其哀音壯節
感人自深又時出天籟可泣鬼神宜黃陳少香先生出其
遺藁見示其舟泊禦黃壩與客談南河事五言古一篇可
謂天心國體至理至情悉於詩見之真不朽之作也其詩
云我朝創大業前聖難同揆新疆與南河歲輸千萬參
庸儒皆咋舌謂不可長恃是殆知其一而未知其二我今
住河干請言治河意古來無河患患自治河始況與漕兼
營顧此則失彼聖人豈不知此中存理非獨治漕河
有三善可紀一曰散大利惡其聚於已宋有花石綱唐有
花鳥使皆因大盈充遂教宮市起國家增幅員富強古
莫比南河三百萬太倉一稔猛斬此水衡錢若不擲河決
恐後世子孫奢淫由此起閭閻藏富厚宸衷屏汰侈內

以清君心外以昭國體誰知利民心卽在勞民裏不言其
所利吾道斯爲美二曰贍閒民使轉移執事淮徐古瘠區
饑饉每薦至谷蕪歎化僞野菑嗟遷徙鴻雁中澤飛哀聲
聲不已佩犢而帶牛都是少年子盜賊沿河衢日暮愁姦
宄自有河工來人得歸鄉里寸土換金錢尺麥薄麻泉草
木與泥沙凶年可救死雖無田得耕荷鍤卽末耜匪獨固
隄防并可安邊鄙三曰勸小吏人才無廢棄養士數百年
棧樸以萬計流官祇數千安能盡位置河漕幕府開多士
登濟濟赴赴衆武夫沿陽効臂指或躬操畚築或親略基
趾邊圉今又安久不拔弓矢藉此習勤勞免教肉生髀倘
無漕與河斯人皆攢退勇士急功名保無有他志惟茲三
善該詎以一愆改累朝由舊章董勸期無怠豈無瓠子

歌 聖神心不悔 頗聞河決時 庶衆多私喜 此喜胡爲然
民情可見矣 敢憚轉輸勞 千錢市斗米 海運卽萬安 權宜
誤國是 慎莫議紛更 天命勸顧諟 今更際 昌期百神胥
受祉 馮蠡久切和 河流皆順軌 或慮洪湖乾 或愁高堰圯
或欲疏海門 或恐淤河底 不知經國謀 所求在根柢 君子
強爲善 成功安可企 唯此恤民心 彼蒼常監視 江河或改
移 天地無成毀 南河求治安 所恃者唯此 此語雖迂疎 須
能究原委 雖乏治河策 差殊測海蠡 舉首望京華 迢迢隔
煙水 客再詢新疆 請更裁寸紙

候官黃小石比部

紹芳

著有蘭陔山館詩鈔

道光丙申進士
官刑部主事

比部幼穎異 絕人目光如電 數武外能辨小楷 其詩幽秀
古豔如老樹已花 空翠欲滴 又如朝霞點水 芙蓉試風 七

言律風格高騫蔚然深秀其五古山行詩云春山如佳人
終日對不厭清溪開鏡面靚妝照激澗脩眉鬢髻欲如
顏色艷纖穠皆可圖但恨畫手欠溪邊三五家佳處茆庵
占誰歟此躬耕時復角巾墊遇勝輒留連譬若食求饜帘
影遠招人邨酒味頗醺夕照上桃花春風滿山店仙霞關
云竹光團綠雲日色冷孤嶂山落百蠻中路出青天上關
門迴孤峰飛鳥未敢傍一綫走中原石角皆北向閩藩昔
芽蘖豕突逞狂妄堂堂李文襄提兵扼其吭賊騎阻長驅
當關氣特壯旌旗太末城俯視覺神王半壁東南天一洗
黃茅瘴清晏三百年雞犬保無恙時有採樵人落日聞歸
唱暮抵坊口云墟落生晚煙暝色帶諸嶺宿鳥投林喧水
田亂鼃黿嗟予事行役踪跡逐蓬梗邇復爲餓驅薄暮馬

猶騁星火出遙邨初月吐微影未厭征途紆愛茲山路靜
七里瀧云春山處處啼畫眉扁舟正下嚴灘時子陵已往
不可作猶有凜凜清風吹莫管沈淵與洗耳富春山水由
來美無風卻愛出瀧遲柔櫓咿啞七十里書懷寄薩荔農
廣文云海內紛多故艱危定可支野雲元自懶流水欲何
之滄海論殘劫屏風對折枝尙堪謝猿鶴未決出山期縣
亭嶺卽心寺云急溜穿巖穴歸雲護石根溪風涼到磬海
氣白當門鳥啄垂枝果僧鋤傍寺園往來慙負米芋火未
須論丙申正月四日北行示諸弟云分手勞勞送客亭春
風春水好揚船關河迢遞逾千里家世清貧守五經身上
北堂慈母線天邊南極老人星鵲聲望我泥金信更仗池
塘夢筆靈延平云巖疆門戶古名區斥埃森嚴扼一隅灘

石亂如撐劒弩峰形圓肖挂葫蘆

將至郡城有山曰葫蘆山

東西水繞

雙虹亘高下山園萬雉孤見說化龍神物在至今還射斗

閒無干役建溪妹婿陳子葆千翊人餞予江上次日解維

舟中得詩寄之云琵琶底事感湓城且作檀槽出塞行戎

馬關山多戰壘乾坤日夜送江聲中年絲竹陶哀樂異地

風霜戀弟兄酒半不須嗟拊髀與君抵足到雞鳴鵲首西

行水向東江干別袂太匆匆春波碧草銷魂易遠志當歸

入感同世事總輸牛背笛浮名不借馬當風龍媒努力期

年少落拓休輕號長翁楊花飛去作浮萍天下傷心送客

亭容易重圓秦代月本難常聚潁川星多情檣燕喃喃語

無恙鄉山故青獨惜縫窗連夜雨不曾來此對牀聽九

日遊承天寺鵬哥山云

寺在泉州東門內

來作茱萸醉一場角聲

吹晚海風涼霞明極浦帆千葉秋冷晴天雁數行人代滄
桑銷霸業江山麗藻入詞章永嘉南渡衣冠地景物猶傳
似洛陽吳錫谷員外招同陳秋厓大令遊萬戶巖云海波
無際接天流巖石青蒼擁上頭東去祖生當擊楫南來王
粲此登樓洗翎天地鳴雙鳥回首邱山重萬牛蕃舶賈櫓
相次泊暮潮風起笛聲愁石鎮許騁千明經江樓話舊云
樓外溪山玉畫叉酒杯詩卷對橫斜櫓枝何處來秋雁和
我吟聲出蓼花丹楓搖落思何堪話到天涯酒易酣一片
風帆數聲笛青山處處似江南漁谿道中云昨宵風雨颯
淒淒酒醒時聞野店雞今日水聲山翠裏一鞭晴色下漁
谿經雨禾苗著色青谿童放犢向前汀年來斥堠無烽火
十里人煙冷戍瓶

茗生內翰天資高妙襟懷爽朗故各體詩一空俗響西江詩
家蔣藏園太史吳蘭雪刺史陳少香先生朱芷汀孝廉艾
至堂大令外當以內翰爲最其揚州歌寄王霞九侍御云
蒼鷹盤大野百鳥聲啾啾君坐烏臺上聽我歌揚州揚州
能媚人莫如鹽商巧揚州能殺人莫如鹽商狡媚人醉顏
酡鮑家金卷荷錦幃四十里珊瑚七尺柯峩峩大官府紅
旆當衢路鹽能令公喜亦能令公怒公喜猶可過公怒當
奈何前門進賄賂後堂聽笙歌歌聲猶未歇炮臺飛霹靂
火促點弓兵將軍夜擒賊擒賊來何方某水某山莊但見
負鹽人哭聲震道傍道旁私哽咽我行堪歎息口渴不得
漿腹饑不得食健兒好聲手耕作值年荒來時別父母鉗
無三日糧有鹽全家笑無鹽全家泣八口望炊煙一肩歸

壓雪惡溪流水鳴如聞鉦鼓聲深林燈火出疑有鳥槍兵
槍聲忽轟起紛紛赴江水白骨已天涯紅閨猶夢裏生者
盡傷殘匍匐泣河千幸免入官府莫嗟行路難同是江南
民貧富皆赤子富兒以鹽生貧兒以鹽死死若恨茫茫冤
魂思故鄉官兵不敢怨只是恨鹽商鹽商不賣私私鹽無
買處賣私以功褒買私以罪捕鹽商爾何人賊民今若此
誰知殺人刀藏在媚人裏君坐烏臺上風采天下聞可憐
南鄉子望歲還望君我作揚州歌思君心獨苦鳴鳳在朝
陽北風煩寄語舟中見月云我與明月同出門燕山官閣
共黃昏今夕艤舟江上住月亦隨人掛江樹天涯回首望
長安瓊臺玉宇最高寒紫薇花下無人伴青鳳城頭獨自
看昨宵落魄秋江裏一片清光留幾許星辰爛爛去朝天

不爲蟬娟訴離苦蕭蕭白荻荒煙且爲離人照不眠
花望爾還山去疎影還香禁十年送秋三首云送春猶可
過送秋將奈何我於春風苦無分唯秋與我同軾軻而今
并此舍之去吁嗟吾意其蹉跎卽今眼前論離別我是主
人秋是客我生况無百年身秋還作主我作賓非人送秋
秋送人花天狂艷不可當秋風一掃生清光涼月娟娟出
海嶠不照繁華照枯槁古來惟有楚大夫不識此時風月
好登山臨水發悲歌先生感慨何其多遂合金天少顏色
吁嗟秋兮奈爾何我今飄泊何所成扣弦但欲爲商聲唯
有秋風不世情昨來江上相和鳴落葉哀蟬亦歎息逋臣
釐婦皆涕零此時月白霜露清我心所感猶和平但愁過
此多冰雪其聲凜栗難爲聽過天妃聞云一牖插天懸瀑

布此間豈是行舟處我如有翼能奮飛安肯擲身作孤注
收帆振舵船倒行大鉤巨纜相支撐快如千里下坡馬迅
如九月脫鞴鷹榜人善泅水鬼門望生還同輩皆走避爭
從壁上觀我時臥病莫能興但從枕上聞水聲須臾一溜
從天下擲枕大呼吾得生我聞古人重死所親在不許友
以死賦命窮薄輕江潭東坡先生此言兒戲耳我生雖薄
受恩多報稱未能嗟坎軻七尺相思有用處嗟爾蛟龍勿
輕訶黃天蕩云黃天蕩無風三尺浪謠語云是蘄王鏖戰處
江天蕭瑟難爲狀南渡四京皆沒賊金人凱唱還江北將
軍僅有八千人用之乃以一當百初向金山設伏兵戒令
江中聞鼓聲廟兵忽先岸兵後紅袍卻放烏珠走此時天
肯喪烏珠六飛不向靈安都我知黃天改顏色縱有風來

浪亦無江中夫人執枹鼓江上健兒縛龍虎

龍虎大王鳴鳥珠婿也

呼搗賊不擒王將軍視之如腐鼠鸛河已報鐵騎逃龍灣
復與水師遭南人使人如使馬海艦進泊金山下每縋一
縋沈一舟鐵索大鉤真健者還我江山復兩宮將軍指日
告成功功敗垂成眞可惜何人獻破海舟策滿江煙燄蔽
天來頓使我軍氣成墨嗚呼閩人何足誅八千人向蒼天
呼至今黃天蕩無風亦有三尺浪月夜旅思云時阻泊廿餘日昨
宵一雨天空蒼天門新掃蛾眉妝江山雖好不相識唯有
明月來故鄉幾時春酒變江水醉魄沈沈呼不起可惜天
涯三五時不堪客路四千里荒雞喔喔霜滿天隻埃雙亭
飛白煙長夜漫漫人不眠月亦如人瘦可憐拋卻梅花三
百樹來照黃蘆苦竹處月乎爾豈不能乘風歸何苦與我

同別離文昌橋三首云

橋地於庚戌建於癸亥費金十九萬兩開十年始成吾邑自丁卯後

科名遂盛文昌之應卽此可徵

一河夾城市以橋爲鎖鑰萬家煙火齊九

霄虹霓落春水直流皇華亭行人都上放生閣請公到此

無渡河車斑斑今馬卓卓一時都唱估客樂自庚戌至丁

卯歲吾郡科名有興替皆賦一橋爲轉移始知六邑相維

繫一星炯炯文章台照見京華冠蓋來高車駟馬何壯哉

問君誰是題柱才嗚呼十九萬緡成一橋官師程督民憂

勞男婦輸將竭秋毫願爾蛟龍早遯逃毋俾遺種興波濤

戴筐之曜永眠此千秋萬歲無動搖天津晚泊用韻答陳

謙齋太守云落日滿沙渚北風吹暮濤人隨津樹遠秋入

海天高詩酒供多病星霜感二毛使君憐舊好存問到江

皋滄州云聞說滄州酒曾傾太白卮今朝賞春色風味似

公詩水月無愁夜江山欲醉時何人投綵筆高詠起蟠螭
晚泊云烟波不知處一櫂寄江濱夜火明紅葉秋風長白
蘋蟲聲都在水鷗夢慣依人日暮多岐路何勞更問津夜
宿黃河中云人與魚龍睡野無雞犬聲波濤相震撼星月
不分明此處難高臥何時罷遠征聽風兼聽水我亦夢魂
驚初入淮河云淮水暮迢迢人烟滿畫櫓月明三草壩霜
冷四花橋美酒沽今夕驚濤憶昨宵黃河聲已遠風葉誤
蕭蕭渡江寄王參戎云萬里光明日千帆滿受風江聲來
枕上山色落杯中南北天雖限車書今已同將軍猶肄武
時見戰船紅題徐丈小照云蒼松何處樹太古此空山萬
壑向人靜一琴終日閒濤聲銷壯志雲氣養衰顏況復蒲
團坐年來早閉關中秋旅泊與家人夜話云昨宵風雨響

菰蒲今日秋光滿釣艫劇喜良宵兼水月偏憐小泊共妻

孥燈前分食同心餅天末難爲返哺鳥料得倚閭人不寐

豫藏春酒話屠蘇

計程可於家過

西沽有感云

戊辰召誌在此迎鑒

當年風景說西沽沽上人家畫不如楊柳枝添臨幸後

草茅身記愛恩初清波曉月思瓊樹紅葉斜陽覓綺疏

寂寂文園今臥病他年誰問茂陵書答述齋九日見示諸

作云君從何處得高臺我臥空江只自哀槲葉亂隨楓葉

下蘆花閒映菊花開經年烏帽空箱擲永夜丹爐細火煨

卻喜催租人不到停撓翦燭答清裁霜降後河水猶漲禦

黃壩不能開阻泊二十餘日感賦四首云臨水登山歲月

流彭城風雨餓殘秋黃河奔浪公無渡白酒高歌我欲愁

西楚有才難定霸南河無土可埋憂鄉關日暮知何處南

斗闌干百尺樓漢使頻頻八月槎烟波何處望京華銀河
已被紅牆隔星渚徒將白石誇敢以書生歌瓠子祇憑鑑
信問梅花將軍水令如軍令黃鵠高飛聽暮笳彭城懷古
二首西楚故都云十月彭城木葉黃漁樵閒話小滄桑美
人花謝隨流水山中多虞美人花戲馬臺空自夕陽雖泗湍聲猶
叱咤芒碭雲氣已淒涼江東子弟今猶昔不聽悲歌亦斷
腸東坡黃樓云三百年來無此樂江南江北兩高樓樓在石岡
江南采錦袍畫舫成陳迹羽服金杯又俊遊詩與黃河爭
氣象酒傾名士更風流坡仙去後扁舟到漂泊彭城我亦
愁坡公詩曰我時羽服黃樓上明月正照金叵羅李太白死世間無此樂三百餘年矣坐客三十餘人多知名之士
黃河云一川浩浩悲長逝四野茫茫亘大荒何苦與淮
較強弱但能到海卽歸藏將雪未雪日猶白無風有風天

亦黃縱爾奔流猶欲怒古來多事議宜防次韻述齋浦上
見贈云汎宅浮家歲月彌煙波雖好放船遲名花零落空
山裏駿馬悲嘶伏櫪時殘菊傲霜如我病早梅臨水似君
詩十年不作揚州夢孤負冬郎絕妙辭夜過淮安云寒雲
慘淡月黃昏近水人家早閉門輕薄雨淮餘子弟艱難一
飯到王孫英雄未遇庸非福恩怨無多不要論且向山陽
沽美酒明朝風雪滿江村揚州憶舊云江都舊夢悵如何
錦瑟年華一擲梭十里煙花渾不似二分明月更無多蕪
城有樹皆黃葉瓜步非春已綠波聞說公私凋敝甚扁舟
細雨載愁過將至金陵憶舊云京口挂帆纔百里江山無
處不銷魂鼓鼙南渡黃天蕩楊柳西風白下門桃葉新歌
迎畫漿梅花舊夢憶清樽俊遊十載難回首濁酒哀箏子

細論采石岡懷古云采石嶙峋翠接天江流到此欲迴旋

六朝戈艦爭姑熟萬古舫船醉謫仙此去金陵纔百里

語見

南史我懷明月已千年英雄馬槊詩人筆一樣湮淪付暮煙

虞忠肅祠云倉皇采石犒師來三五零星亦可哀士氣一

呼同涕淚江聲九派挾風雷大功乃出儒生手再造居然

宿將才卽看荒祠留戰處神燈夜半照蒿萊牛渚磯云巉

礧業業水滔滔此地曾經百戰鏖一矢至今開絕壁三山

終古鬱奔濤然犀人去腥風起詠史船來凍月高知是謫

仙懷古處敢將硬筆圖詩豪江上對月寄懷許萊山學士

祝蘅畦侍講蔣笙陔宮贊云五雲飛處望蓬萊誰念橫塘

獨客哀雪夜扁舟孤鶴過江天一笛大魚來烏棲白下多

楊柳翠羽黃昏見早梅遙想故人天上住宮壺御燭醉春

黯潯陽舟中除夕云蠟燕絲雞滿柁樓榜人沽客共賡酬
燈前紅橘思親淚江上黃蘆送客愁幾日冬心溫薄酒今
宵春夢到扁舟年來詩思清於雪祭汝潯陽水一甌

漳浦藍玉霖太守

鼎元

著有淝洲集

雍正癸卯優貢
官廣州知府

太守明

韜鈴習吏治童時卽自廈泛海泝全閩島與秣浙洋舟山
而歸南至南灣澄海海門往返波濤熟悉形勢及長佐族
兄南灣總兵廷珍幕康熙六年臺灣朱一貴倡亂全部俱
陷廷珍提萬人往七日平之旋授臺鎮安民弭盜 朝廷
無南顧之憂皆太守經畫也四庫提要云平臺紀略藍鼎
元撰是編紀康熙辛丑平定臺灣逆寇朱一貴始末鼎元
之兄廷珍時爲南灣總兵官與福建水師提督施世驍合
兵進討七日而恢復臺灣旋擒一貴鼎元在軍中一一親

見故記載最悉所論半線一路地險兵寡難於鎮壓後分
立漳化一縣竟從其說至今資控制之力亦可謂有用之
書矣全閩詩錄謂太守於雍正六年冬以相國朱高安薦
授普甯令兼攝潮陽擊斷如神吏民畏服以窮治官運船
戶盜賣事忤觀察某誣揭削職後制府鄂西林知其冤延
入幕中年餘具摺雪引 見授廣州守抵任踰月而歿所
著鹿洲初集二十卷女學六卷東征集六卷平臺紀略一
卷綿陽學準五卷鹿洲公案一卷修史試筆六卷已付刻
凡講學談經均未免拘墟之見惟指陳時務動合機宜其
經濟誠有大過人者如論海洋捕盜之法謂商船患在不
能禦賊宜給炮械使之有恃哨船患在不能遇賊出哨官
兵宜密坐商船勿張聲勢賊船在近不在遠沿邊灣口可

停泊之區忽往搜捕百不失一賊船嚮邇可追卽追否則
佯爲退避以堅其來挽舵爭據上風賊已在我掌握旣獲
賊船卽以所得盡賞士卒首功兵丁拔補把總將弁以次
陞遷如此則將士之功名財利俱在賊船將不遑寢食以
思出哨矣又謂洋匪接濟多由哨船火藥軍器犯禁之物
惟哨船可以攜之轉貨賊船利愈十倍故兵士謂坐港之
利甚於通番民船作弊官兵可緝官船作弊孰敢嬰鋒是
在提鎮留心稽察皆今日吾閩之急務也 國朝詩人徵
略云鹿洲公案二卷藍任庵先生自述其領縣時所讞之
獄也許青士觀察重爲校刻昨貽余一帙讀之歎其精敏
之心果斷之識誠足爲牧令之標準矣讀至仙村樓一則
令人歎縣令之難也夫以巨盜馬仕鎮負嵎悍鷙爲患鄉

間先生旣以計獲之而上官文移駁詰往返經年竟未獲
按法懲治萬一漏網則愈肆其毒矣嗟乎縣令中有心爲
民除惡者難得其人有其心矣又患無其才有其才矣又
以文移駁詰累年經月而卒未能置盜於法如是則惡人
何以畏哉惡人畏而善人乃可安也吾乃今而益歎鄭大
夫以猛之所以爲惠人也太守詩有臺灣近詠十首其於
番俗夷情洞若觀火今擇其尤者數首云臺俗倣豪奢亂
後風猶昨宴會中人產衣裘貴戚愕農情士弗勤逐末趨
驕惡囂陵多健訟空際見樓閣無賤復無貴相將事樗博
所當禁制嚴威信同絳綬爲火莫爲水救時之良藥臺地
一年耕可餘七年食今歲大有秋倉儲補云急穀貴慮民
饑穀賤農亦惻厲禁久不弛乃利於奸墨徒有遏糴名其

實竟何益諸羅千里縣內地一省同萬山倚天險諸港大海通廣野渾無際民番合喁喁上呼下卽應往返彌月終不爲分縣理其患將無窮南劃虎尾溪北距大雞籠設令居半線更添遊守戎健卒足一千分汎扼要衝臺北不空虛全郡勢自雄

詩有搜羅極博可補方志所未備者如朱竹垞鴛鴦湖櫂歌一百首邵二雲大明湖櫂歌一百首嚴仙舫沅江櫂歌一百首李蘭屏揚州雜詩八十首頗稱賅備余友黃小石比部出示莆陽雜詠二十四首搜羅旣博詩亦情韻獨絕近代可合翁山阮亭樊榭蘭雪而五蓋其詩天資旣優而參以典麗遂一空俗響其詩云門前溝水自西東艤子搖波曲曲通六月勾人船上坐夕陽城郭荔支風柳陰夾岸碧

迢迢半里陂塘八九橋見說三江風浪惡木蘭陂水不通
潮山川雄鬱古名都沃壤平疇繡錯鋪比戶絃歌似鄒魯
莆中學始鄭南湖刺史真無愧比干清風凜凜逼人寒軍
門吾戴吾頭走借作頑奴砥石難落花舊宅句重吟黃卷
黃樓近可尋誰續閩川名士傳居人猶指讀書林溪西著
述卻徵車修史堂邊夾際居我愛白湖陳直閣高山仰止
紫陽書萬卷樓儲煙海寬蠹魚三食付凋殘鹿山曠達無
人繼一笑龍威借讀難報劉令伯切陳情侍御辭官出懇
誠貪祿忘親知幾輩慈烏夜夜有哀聲雷州不見一尺葛
廉州不見一粒珠瓊州惟有文莊集倘守端州硯也無凋
傷民氣近如何十歎無人繼作歌風喜徐來月莫去當時
何獨好官多報功長者有專祠投盒灘鄰智大師郎罷摩

峇阿因讀至今淚墮李侯碑錢娘遺廟野棠開迎送神絃
奏曲哀猶有巡陂燈隱見靈旗風雨夜深來風煙喬木舊
朱門歎息如聞句句尙存歲歲銜泥雙燕子可憐辛苦爲兒
孫高塚豐碑葬達官寒鴉啼處夕陽殘端明壘近楓亭驛
多少行人下馬看粉牆低映樹扶疎兩岸人家曉鏡鋪紅
鏡遮門窗映水樓臺多處小西湖女郎十五耀銀璫解誦
周南第幾章生長梅妃舊鄉里猶梳高髻學宮妝竹籠筠
筐滿市頭賣花斜日過譙樓紅裳窄袖誰家女愛畫雙眉
不畫愁迎仙橋下水拖藍沙港衝潮種蛤蚶三印子魚風
味最網師多集小姑潭漁郎來往仙源熟撈得春風滿載
紅狼籍酒邊花片片色香注入食單中小鳥羣飛上刺桐
和鳴律呂應雌雄不知閨月能增否但聽人呼十二紅荔

子紅時郎欲行摘來雙荔乞郎名同心結就丁香核泥試
郎呼是側生寶溪寺畔玉琤琤山色晴飛面面窗倚遍橋
闌觀瀑布蜿蜒十丈下西淙西湖鷗鷺久忘形隱見西山
列畫屏比似鴈台落吾手亟從地主借圖經棹謳漁唱滿
烟潯南北菡蘆水淺深唱作竹枝聲縹緲先生詩境此中
尋

嘉應宋芷灣太史

州

著有卜易居齋集及豐湖漫草續草

嘉慶

已未

進士太史襟懷豪邁具權奇倜儻之才詩境沈鬱頓挫得

少陵家法不必規撫前賢實從性真塗涌而出嶺南羣雅
謂其詩沈健得之杜豪快得之蘇而忽如騰天忽如入淵
忽而清清泠泠忽而熊熊煥煥則出於性靈而自成面目
者也余尤愛其五七律氣體渾雄爲嶺南之秀雜詩云汲

井下銀瓶瓶起月上手瀉水入銀栢舉栢月亦有納之心
與腸足可轉八九八九轉無端捫之清且寒誰謂心腸中
不能如井寬閱世四十年忽忽歎無成人苦不自知百感
戕其生陶潛猶乞食杜甫尙依人吟詩豈在好得酒還獨
傾公卿聞羨人我何羨公卿別湖水云我出具一艇我入
奉一瓢我衣無宿垢我硯有良苗猗嗟湖之中於我乎逍
遙懷哉清漣漪臣心以久要桃花云宜笑自成憐如言轉
不妍無人有人處一水一橋前暮雨條條暗春風面面圓
滿山何遽俗莫倚海棠眠聞雁云只道霜應落甯知雁已
飛寒空千響咽獨夜一燈微到我門前水逢人月下機莫
因無字去須得有書歸湖居云藤菜家家足山茶戶戶儲
門生時致酒鄰父或投魚詩半聞鐘後行多過雨初江湖

真滿地風月自吾廬竹外月光來湖天洗更開六橋千點
樹獨夜一層臺海隔人間世身留掌上栢不知蘇玉局可
似我徘徊屋後新亭子能來醉幾回江流斜日去月照大
蘇來太守先能賦諸生亦異才都須留幾字鐫上綠莓苔
家好年常住詩須日一篇盤盤青草地曲曲白鷗天便擬
求湖疏多留賣賦錢買山兼買水二頃稻花田秋晚準提
閣二首云湖到山前大天從海外微城眠江暗轉邨出樹
明圍半閣新楓葉三秋老客衣頻來無一事捫蝨送斜暉
葉帶疎鐘下人先一鳥高眼前身是粟天際鶴無條兩塔
捧雲定一燈蹲佛牢風旛無限理江月自江濤清溪舟中
云翠竹來醒目清溪此寫心月沙寒自靜石水淺能吟永
夜聽舟語初歸喜土音誰知惠州客破涕始從今登臆鷹

臺云元室君臣夜獵回國門留此晾鷹臺寒沙立馬荒荒
沒落日盤鷗故故來飛放泊前空水濶醫無閭外陣雲開
書生不解腰弓矢懷古登臨暮角哀查大理淳家藏謝文
節橋亭卜卦硯屬爲詩云摩挲贗墨玉庚庚想見夷齊萬
古情國旣無人焉問卜臣猶有母久埋名從容豈愧文丞
相流落應陪玉帶生同是山頭一方石人歌人哭至今并
夏口懷古云仰視浮雲逐鳥飛大江開處一樽壘稀星明
月悲秋夜對酒當歌用古來此水豈宜規戰地用兵終遜
賦詩才江魚尙帶東風血一笑東坡客網回紀騰越之捷
上梅坪制府云不向窮荒耀戰功原知天地有昆蟲負嵎
竟敢將人噬狡窟真須用火攻野人巢穴據險皆焚之纔見雷霆拉
枯朽猶云瘴癘頓英雄連年手決平蠻策誰有綸巾羽扇

風

陽春譚康侯孝廉

敬照

聽雲樓詩草風格清超飄飄有凌雲

之氣論詩諸作高挹羣言辨香當不在太白下嶺南羣雅
謂其詩吐屬溫雅可謂知言其論詩云按圖無天馬善陣
非神兵所以古真人飄然凌紫清被髮騎麒麟赤手縛長
鯨超超萬象旁無形役羣形迴風一長嘯絕迹飛天聲世
人欲從之雲烟渺冥冥惜哉益地圖不見白玉京黃河三
千年疆域移分星天地方圓規巧立無定程元氣茲渾淪
上下相合併巨手摩鴻濛文章得天成蒼蒼覺空濶一一
歸研精日月蕩天門容隙俱光晶望之杳難卽取之隨已
盈團團捫渾儀瑣瑣窺山經人間竭人力不作升天行仙
才謫塵寰猶以謝鮑驚悠悠我所思十二樓五城緬懷工

倅初亦以規矩耳及夫人巧極天工乃尺咫尺元精貫當心
萬物在我指人誰可傳言我自長不死有如山水音自然
中宮徵使其按節歌陽阿亦巴里可憐列子肘仰見伯昏
跣至人不射射揮斥盡弓矢機動任吾天道存進乎技苟
非神明存敢以成器訾奇肱製飛車甯復眠塵軌離婁公
輪般要是人間子四月十三夕黃香石過談白雲山之遊
云席間聽香石自雲口記把酒對明月聽君歌白雲君身
有仙骨自是雲中君勝具由天授壯遊自我聞坐令虛白
室空翠落紛紛春草云尋春春渺茫隨爾至何方一碧自
千里四山多夕陽離亭侵馬足古道斷人腸處處生愁思
天涯夢亦長寄西峰草堂李季子云秋氣入天輕空山落
照明白雲低樹影黃葉絕人聲之子事巖隱幽居無世情

松花墮潭水流不到江城

自鳴詩鈔番禺田西疇諸生

上珍

著劉藻林

彬華

玉壺詩話

云西疇人品高雅不慕榮利其詩瓣香白陸脫手如彈丸
僻澀詭譎之習一掃而空之諸生寓懷諸詩爲時所傳誦
余尤愛其詠淚二詩字精句切詩云事去英雄輒自傷分
携終古怨河梁江南賦後頭全白夔府秋深菊又黃垂老
班超留絕域多情司馬謫潯陽獨憐晉室諸名士枉向新
亭灑數行湘江竹上恨離離幾樹梨花帶雨飛古戍月明
笳亂響長門燈暗指頻揮客從易水驅車去人自西州策
馬歸今古飄零知不少傷心何獨漢臣衣

閩縣家少估孝廉

方藹

余已亥同年也著有敬輿堂詩草詩

筆灑然拔俗詠史諸作尤具特識其題御服碑後得言外

諷刺之神詩云杜宇聲聲啼曉枝六陵劍佩杳何之趙家
龍種憑誰在手勒皇元御服碑可與史明古題趙子昂畫
蘭國香零落佩纓空芳草青青合故宮誰道有人和淚寫
托根無地怨東風同一諷刺皆有忠厚之意孝廉更有息
夫人詩出於天籟詩云一語蔡侯囚再語子元死人恨花
無言花言乃如此孝廉工書法得顏褚之訣云

向余謂露筋祠詩王阮亭後絕少名作蓋以未能超脫故也
及讀黃小石比部紹芳高郵露筋祠詩不着一字儘得風
流起二句尤極渾成阮亭見之定當把臂入林也其詩云
三十六湖水門前流最清神鴉迎客權社鼓疊春聲表潔
羞蘋藻寧香采女貞竹枝哀怨調船笛若爲情

諸將漢家騫日月故人天上動星辰此吾閩徐幔亭先生

煥

過釣臺詩也下語渾成不可多得以視一著羊裘便有心
及雲臺怎比釣臺高羞見先生面黃昏過釣臺等句相去
遠矣

福州女士朱芳徽孺人

懿卿

山人姜蘭雨

承霽

室也著有綠

天吟社詩草詩筆嫺雅出於性情其呈蘭雨句有留心經
濟須傳世有志功名始讀書可以觀婦道矣其冬夜聞機
聲有作云欹枕朦朧夢又驚忽聽鄰院送機聲穿梭暗度
疎風急轉杼時隨滴漏輕十指俱寒憐夜靜一燈相伴到
天明可憐純袴豪華客豈識貧窗尺寸成新正病中有感
云客顏消瘦疾時侵黃土無情感慨深諱病不教夫婿識
恐妨分却讀書心人心叵測語難當底事紛爭只自戕欲
問華佗醫國手可能醫俗有奇方五言句如風定秋無語

月明影不孤
七言句如病况云曉妝未竟還支枕午睡頻
驚怕叩關洪山塘卽景云黃雲百頃無餘地古木雙枝欲
際天又雲樹烟濃迷島影蕉林風過作濤聲晚景云老槐
負月妨花影亂鳥投林作雨聲夜坐云晚風入樹鳥先覺
涼月到窗人未眠述懷云世態不關心自靜風塵無累性
還和數詩不愧閨中風雅

射鴈樓詩話卷十

侯官林昌彝惠常輯

定盦詩集四卷仁和龔璚人儀部

自珍署

道光九年進士禮部主事儀部

爲金壇段茂堂先生外孫學問淵源蓋有所自古文詞奇

崛淵雅不可一世余嘗選其文入近代十二家文鈔其爲

學凡經學六書子史下至金石鐘鼎古文皆悉心精究詩

亦奇境獨闢如千金駿馬不受絛紲美人香草之詞傳遍

萬口善荷聲道州何子貞師謂其詩爲近代別開生面則

又賞識於絃外絃味外味者矣中年以後博奕好飲酒諸

事俱廢是亦學人之一病也其紀遊詩云春小蘭氣渾湖

空月華出未可通微波相將踏幽石一亭復一亭亭中乍

睡黑千春幾輩來何況嬋媛客離離梅綻蕊皎皎鶴梳翎

鶴性忽然馴梅枝未忍折竝坐戀湖光雙行避薛跡低眊
有誰窺小語畧閒息須臾四無人顏弱未工熱安知此須
臾非隸仙靈籍侍兒各尋芳自薦到扶掖光景不少留羣
山媚暝色城闌催上燈香輿并烟陌溫溫懷肯忘曖曖胸
靡及祇愁洞房中餘寒在鴛屨秋夜花遊云海棠與江蘼
同豔異今古我折江蘼花間以海棠嫵狂呼紅燭來照見
花雙開恨不稱花意踟躕清酒盃酒盃清復深秋士多春
心且遣秋花妬毋令秋魄沉云何學年少四座花齊笑踟
躕取鳴琴彈琴置當抱靈雨忽滂沱仙真窓外過雲中君
至否不敢問星娥過菩薩墳云菩薩墳者亦曰公主墳遠
聖宗第十女墓也卜字菩
薩未嫁而死遼史無傳北方海棠少此地始生之自是海
棠之盛逾於江國士人因以海棠謚主云墳在西南無相
寺菩薩葬龍沙魂歸玉帝家餘春照天地私謚亦高華大

脚驚文鞦明妝豹尾車南朝人未識拜殺斷腸花世上光
陰好云世上光陰好無如繡閣中靜原生智慧愁亦破鴻
濛萬緒含淳待三生設想工高情塵不滓小別淚能紅玉
苗心苗嫩珠穿耳性聰芳香箋藝譜曲盡數窗櫺遠樹當
山看行雲入抱空枕停如願月扇避不情風畫漏辰千刻
宵缸夢幾通德容師窈窕字體記玲瓏朱戶春暉別蓬門
淑景同百年辛苦始何用嫁英雄秋心云秋心如海復如
潮但有秋魂不可招漠漠鬱金香在臂亭亭古玉佩當腰
氣寒西北何人劍聲滿東南幾處簫斗大明星爛無數長
天一月墜林梢我所思兮在何處胸中靈氣欲成雲槎通
碧漢無多路土蝕寒花又此墳某水某山迷姓氏一釵一
佩斷知聞起看麻麻樓臺外窈窕秋星或是君小遊仙詞

云麻劫丹砂恨未成天風鸞鶴怨三生是誰指與遊仙路
鈔過蓬萊隔岸行玉女牕中梳洗成隔紗偷眼太分明侍
兒不敢頻頻報露下瑤階濕姓名珠簾揭處佩環搖親荷
天人語碧霄別有上清諸女伴隔窓了了見文簫寒暄上
界本來希不怨仙官識面遲僥倖梁情通一語回頭還恐
歲星疑丹房不是漫相客百劫修成忍辱功幾輩凡胎無
覓處仙姨初豢可憐蟲露重風多不敢停五銖衫子出雲
屏朝真袖履都依例第一難箋纓絡經不見蘭旌與桂旌
九歌吹入鳳皇簫雲中擲手誰相送依約湘君舊姓姚仙
家雞犬近來肥不向淮王舊宅飛却踞金牀作人語背人
高坐著天衣諦觀真語久徘徊仙椿同功一繭裁姊妹勸
書塵世字莫瞋倉頡不仙才金屋能容十種仙春嬌簇簇

互疑年我來敢恨初桃窄曾有人居大梵天吐火吞刀訣
果真雲中不見幻師身上方倘有東黃祝先乞靈符制電
神電神姓李見神仙錄衆女蛾眉自尹邢風鬟露鬢覺伶俜捫心半
夜清無寐媿負銀河織女星夢中述願作云湖西一曲墜
明璫獵獵紗裙荷葉香乞貌風鬟陪我坐他身來作水仙
王儀部舊名自珍今改名鞏祚

高密單芥舟明經詩風骨谿徑迥異凡俗其青緇道詩云青
緇大道中石坂亦層裂左有古馬蹄右有古車轍自有此
道通車馬無時歇所載名利客並隨風塵滅去者日已多
來者日不絕我來何所求時哉方觸熱老客詩云客老難
爲強馬老難爲驕老客跨老馬早出東門橋是時天陰重
雲寒風蕭蕭僕夫指前路原野春寂寥仰視孤鴻飛哀鳴

求其曹所急非利名胡此心獨勞讀二作知明經詩律之
精胸次之曠矣

作詩之旨如元酒太羹不必求人人皆知正惟知我者希則
我貴亡友張亨甫詩才俊逸雄視一代所惜者每下筆時
欲求人人皆知是爲一病金元遺山感興詩云好句端如
綠綺琴靜中窺見古人心陽春不比華黃曲未要千人作
賞音

養一齋詩話云常建松際露明月清光猶爲君劉脊虛松色
空照水經聲時有人陶翰夜來猿鳥靜鐘梵寒雲中李願
行客暮帆遠主人庭樹秋岑參不見林中僧微雨潭上來
綦毋潛晚風吹行舟花路入溪口王昌齡遠山落日在空
波微烟收崔曙空色下低水秋聲多在山李疑月色徧秋

露竹聲兼夜泉萬楚野聞犬時吠日暮牛自歸皆曲盡幽閒之趣每一誦咏煩襟頓滌乃知盛唐諸公古詩深造如此不必儲王孟韋而後盡物外之妙也

小芙蓉舫詩鈔四卷閩縣林子萊孝廉

仰東

著子萊幼穎異

絕人年十一輯唐人詩爲古近體傳觀殆遍余識子萊於劉炯甫座上隨與之定交子萊甫冠負不世才所至魁其儕偶子萊詩初學隨園及十硯翁余力勸其取法乎上子萊自焚其稿遂肆力於漢魏三唐宋元明諸大家三十後詩境日益進上自漢魏下至唐人高岑王李諸家莫不登其堂而嚼其馘壬辰春余應龔君壽齋聘校其祖海峯先生遺集時子萊方設帳其家聯牀夜話相得益歡子萊喜吟詩同學中獨愛余視余若手足不可離每爲詩必授余

讀之余年二十遭家不造久傷屯厄所如輒不偶而子萊獨賞識於風塵之外當夫更闌燈施月落參橫未嘗不促膝談心互相砥礪也道光壬辰以上舍生舉於鄉計偕北上凡所過勝地名區必吟諷不自置鄆筒所寄嘆其詩筆愈著世所謂得江山助者余於子萊益信哉試禮部屢黜路出大江南北當軸震其名爭欲延置幕府子萊夷然不屑歸結茅屏山之麓日嘯歌其中客至終日清言娓娓不倦而酒酣耳熱與余上下千古抵掌欬戲幾欲唾壺擊碎也戊戌丁外艱哀毀備至未逾月鄰人被火幾及其屋家故無健僕子萊抱棺號咷聲震遠近閱數刻火息屋得無恙因是患肺痿疾猶力疾課徒不倦己亥余領鄉薦將北上來別子萊子萊執手泣然曰予疾亟矣恐與君無相見

期也余曰君以千秋自命慎自愛子萊曰生死寄耳惟文章之一脈而無窮期百年後知有詩人林子萊於願足矣庚子夏余從京師歸於南浦旅次聞子萊訃驚疑交集及抵家始知於五月逝矣時年三十有八悲哉夫人少小相知當其握手締交綢繆恩紀或偶一睽違歧途邂逅猶且下車躑躅傍徨不忍去况於生平道義之交生死之際能不爲之怛焉悼愴爲悲也夫子萊嘗繪翠袖倚修竹圖題詩贈余云涼翠障天天欲濕鏡檻參差拂雲立美人生小怨華年袖長已覺西風入問渠何事太癡生雙黛無言慘羞澀蒼梧水碧思君王日暮翠華遠莫及杜鵑愁絕不可聽紅淚零星空飲泣收柯易葉心愈堅湘水千年見衣摺香骨珊珊林下風披圖我欲從長揖結鄰小住烟霞中俯

瞰洞庭夕波急凌霄百尺仙人姿莫似幽蘭怨原隔不然
魂逐九疑飛使我江臯氣嗚咽婢娟微笑若爲情贈我明
珠紅錦囊遠庭相與種新篁直待春來籜龍蟄我擊鼉鼓
君吹簫舉手招得鳳凰集讀此詩令我作山陽聞笛之感
今世士夫病在視已太重視人太輕妻子而外兄弟皆路人
也何論朋友朱竹垞先生有慨世道之衰其襍詩云衡必
錙銖爭錢必子母權佳李鑽及核曲防遏其泉不屑一毛
拔而况千金捐舉世皆楊朱方思墨翟賢然此詩却不必
令楊朱輩讀之彼固不解一句不識一字也

自來作七夕詩者多賦歲時綺節兒女離情吟長恨之歌感
新婚之別雖善言懷未能免俗同里李蘭屏比部七夕襍
感詩五首可稱超脫迥異故常其一云雲漢昭回萬象垂

無端鍼閣豔星期書生獨有豐年祝瓜果田蠶七月詩其
二云功名壽考亦尋常牢落英雄祇自傷空有繡鞦天上
眼衆中先識郭汾陽其三云花樣分明錦七襄金鍼欲度
更無方君看萬古韓文在獨有天孫爲織裳其四云平生
不學柳州辭守拙存真是我師一笑人間小兒女紛紛機
巧萬蛛絲其五云仙家鈿合見無期遠夢雲鬟又別離天
際銀河終到海悲歡應笑萬緣癡五詩可謂翻新易奇然
比部又有乞巧圖二絕云碧落銀河夢有無紅閨韻事更
新摹都將玉臂雲鬟感添入張萱乞巧圖望斷紅橋萬里
秋况留離緒到鍼樓人間天上相思夢對此丹青我亦愁
二詩又不無兒女離情之感矣

竹垞老人諸體詩風格雄秀追步盛唐而法度亦縝密其五

言名句可合翁山愚山二家爲鼎足如曉人郡城云古道
橫邊馬孤城閉水門過吳大村居云一徑野煙夕孤村返
照寒暝云獨樹歸禽少平川隱霧深雨後卽事云日氣晴
虹斷霞光白鳥飛又蛙聲浮岸草鳥影度江天夏日間居
云歸鳥檐前樹斜陽嶺上村語谿道中云陂塘湖水緩桑
柘石門多治平寺云陰崖深綠樹斜日亂峰黃送屠爨入
閩云江猿啼遠近天水入空虛登觀山頂云細雨春歸雁
深山日暮鐘鷺脰湖寄周四云桑麻深杜曲雞犬擾秦餘
歸次西水江行舟被捉云斷續深江樹冥濛細雨天又江
村寒抱被茅屋夜張燈望湖亭對月云遠樹霧中失浮雲
川上來元日陰云故鄉應雨雪絕域尙烽煙金山登妙高
臺云衆水金陵下孤城鐵甕深過光孝寺云寒煙萬井外

春樹六朝餘贈張五家珍云身孤百戰後門掩萬山前夜
泊西南驛云獵火寒歸騎津亭暗落帆三水道中云夕陽
明斷岸風色上征衣送曹方伯還里云秋風空日夜歧路
渺關河阻風珠江云空倉寒聚雀深樹晝聞鶉送嚴煒之
惠陽云晴川疎樹遠落日亂山多梅市飲祁四居士駿佳
宅云窗中交浦樹檻外落風帆題祁六班孫東書草堂云
江花平岸發山鳥過庭飛送汪進士游嶺南云榕葉山城
暗梅花驛路長同王處士施學使陸處士汎舟西湖遇雨
云廻船沙岸火驟雨石門松夜過曹侍郎倦圃云昏鐘藏
古寺修竹亂明星湖上逢楊二給事云碧草湖邊寺青聰
渡口橋夏口西湖同曹學士余山人汎舟云山雷焚斷塔
雷峰塔也沙柳拂晴雲九日云遠山初過雁淺渚舊平沙吳興

客夜云江清楓葉下天闊雁行齊由碧浪湖汎舟至仁王
寺飯旬公房云到門千樹合登閣一峰孤白雀寺云野雲
平石磴江日冷楓杉繚丹楓驛曉行大雪度青雲嶺桃花
隘諸山暮投麗水舟中云饑寒催日暮風雪逼窮途秋日
對酒江心寺云寒潮天外落秋草渡頭生雨云轉添秋草
綠更洗暮山青九月十四日夜月云關山仍遠道西北有
高樓返照云明霞飛不落獨鳥去還歸七夕雨云戍樓連
樹黑漁火隔河明曉發東光縣云落日金樞動疎烟土鏗
高晚次崞縣云雪飛寒食後城閉夕陽中飲厯下亭泛舟
蓮子湖云柳岸鳴蟬急荷風浴鳥輕又竹深池館靜山轉
枕樓斜慈仁寺夜歸同李十九對雪云數錢燈下酒入饌
雪前魚卧佛寺云夜續林中磬春流枕外泉題退谷云閒

中春酒榼靜禪山泉音譚孝廉歸自楚粵訪予維揚喜成
云寒梅探庾嶺秋草下澄陽雨度仙霞嶺云古苔緣樹上
密竹聚峰圓題湯上舍潛籟軒云萬籟入門寂羣花繞屋
開夜起云木落南樓早山連北口寒同郭麟徵訪崙公云
小雨乍潑火輕風無聚沙鹿鳴山晚眺云江光寒轉白峰
色遠逾青安仁云水迴沙市曲山到郭門平顧明府載酒
邀觀三江開云蕭疎何限樹平遠不多山李高士建是墓
下云擔花嘗郭外賣藥遍人間飲方觀園亭云平山窺戶
入遠水出郊澄石湖云過橋湖水闊隔岸野雲生南垞晚
步云高樹不歸鳥小窗明夕陽

鷗汀漁隱詩鈔十卷江西宜黃陳少香先生借燦著先生天
才敏捷好吟詩下筆千言執紙立就以名諸生舉於鄉道光

辛巳就試禮部不捷遊吳越東南諸大府爭相招致相國
阮芸臺宮保陶雲汀中丞陳荳風曾賓谷陳芝楣學使汪
吳泉都轉蔡海城諸先生咸以文章氣誼相契治刺史吳
蘭雪先生尤服其詩決其必傳顧九上公車五薦並以額
溢見遺道光戊戌以教習宰閩中撫字催科臨民之餘不
廢吟咏後宰惠安爲言者中傷遭嚴譴棄官先生天性醇
厚孝友聞於鄉黨結交遍天下士少時好六朝沈博絕麗
之文尤喜庾開府旣而服習兩漢下逮韓柳歐蘇諸家每
下筆馳驟縱橫不可一世絕類老蘇詩初學劍南次學香
山又學東坡四十後詩格出入三唐尤與大林十子爲近
所刊鷗汀漁隱詩集爲昌彝所校定近又刻焚餘集及春
雨樓近詩詩筆愈蒼真不愧西江風雅書法古秀髣髴波

翁畫亦極有逸趣先生愛才出至性尤極賞昌彝詩謂足
嗣響開寶諸家必傳無疑所謂誘之以至於是也先生論
詩極精嘗謂昌彝曰詩欲其真不欲其僞最初爲真後起
非真信於已者爲真徇於人者非真足於已者爲真襲於
人者非真是故讀書有真種子作文有真血脈而作詩有
真氣骨得其真則一花一木一水一石一謳一詠皆有天
趣足以移人失其真則雖鏤金錯采纍牘連篇吾不知其
中何所有也古今論詩有二曰性情曰格調性情真也襲
格調而喪其面目僞矣格調亦真也離性情而飾其衣冠
僞矣此杜少陵所以有別裁僞體之說也又云詩至漢魏
古矣而僞漢魏何如真齊梁三唐美矣而僞三唐何如真
兩宋初盛唐高矣而僞初盛何如真中晚推之僞李杜不

若真元白僞王孟不若真溫李此其得失較然不待智者而後知也

南宋曲端之死史書皆比之岳忠武然非定論陶允嘉符離懷古云張都護殺曲端關中將士皆心寒秦丞相殺岳飛萬里長城一旦墮婁室歡顏兀术喜小朝廷復何恃長腳太師吾何尤魏公九原知悔否朱竹垞文集書張浚傳後云宋之南渡將帥有人可以戰可以守自寄閩外之權於浚喪師動十數萬元氣重傷譬諸孱夫不能復起矣浚於李綱趙鼎則劾之於江伯彥秦檜則薦之尙得云好惡之公平至曲端之死與檜殺岳飛何異讀史者務曲筆以文致端有可至之罪不過因浚有子講學後死徽國公爲之作狀天下後世遂信而不疑耳袁郎中宿朱仙鎮詩云祠

前簫鼓開如雲立石爭鏡弔古文一等英雄含恨死幾時
論定曲將軍江進之讀魏公傳詩云子聖焉能蓋父凶曲
端究與岳飛同何人爲立將軍廟也把烏金鑄魏公可謂
助我張目者也鄞全紹衣曲端論云史臣之爲曲端立傳
也求其一二卓犖可紀之功寂寥無有其纍纍者跋扈遁
逃之狀而已而猶以張魏公之殺之爲非辜且謂南宋不
振之故自殺端始斯誠不解其兒子全子曰吾諦觀端之
爲人亦小有知兵料敵之長而剛愎而不仁忮刻而自用
尤不樂同列之有功名並不顧國家之急難此其所以
再起再蹶而卒之以殺其軀方宗留守之用爲經畧也其
時關隴六路雖已隣於強寇而所在義兵徧野民心未負
宋也端從任事以來聲稱蔑如而志在并軍性復怯戰其

射鷹樓詩話

卷十

十

室自龍門渡河曲方遁矣鄭驥死矣王璘潰矣唐重死矣
同州再破再敗矣端無一旅之赴而誤張嚴於鳳翔使之
輿尸罪一擅斬劉延亮罪二聞鳳翔長安議恢復欲撓其
功擅斬鳳翔將劉彥希罪三又殺長安將張宗罪四王庶
制置六路端不受命八公原之戰飛書止諸帥會兵而遣
遙淳化罪五以金人過河散南義兵罪六庶貢以師會王
庶端又阻之罪七延安之急不救王庶來奔反奪其符印
而謀殺之罪八使部將其間祇有清泥嶺之一捷而又出
自吳玠之功然則誤關隴之事至於四裂而不支者端爲
禍首而當時莫之能問也迨魏公以中樞開府倚其宿將
而朝中頗以前事爲疑於是以百口保之遂有都統制之
命其所以前洗之者至矣然而李彥仙困陝州則不救吳

玠戰彭原則不救皆以幕府之檄促之端之遷延而不至
聽其或死或敗者如昨也臣節至此可謂無復人心者使
以司馬廢莖之法論之專殺固誅失律亦誅慢令固誅負
恩亦誅端之所堪平反者果安在也吾又聞築壇拜端之
日魏公諮詢方畧端言見兵八十萬須斬其半方得其半
之用

見周氏
涉事

信斯言也則雖杜郵之戮不足以蔽其辜也

然世之所以論端冤者則以富平之師端言之而中也當
魏公將出師端謂驟合諸路大舉不若以偏師迭出擾之
是固兵法但魏公此役別有苦心不得以成敗論之是時
行在失守乘輿飄泊鎮江之勝雖足使兀朮膽落而淮上
之軍留連未去魏公懼其復有渡江之舉遂大出師由同
華郾延以擣其虛而兀朮果由六合西行以援陝西劉子

羽王彥之諫也魏公以爲東南事急不得不出於此斯言也執干戈以衛社稷之心如將見之川陝雖挫而東南遂高枕而無事矣中興聖政記以爲魏公非不知五路兵將之情未遑非不知三年養力之期未滿而心憂屬車之清塵然則諸將之言特論事勢者之常豈知夫元老大臣蒿目犯手而爲之者固別自有爲哉至史家言魏公嘗詐曲端旗以懼敵是尤誣妄之甚者婁室以孤軍恣行三輔未嘗一挫於端則其旗固不足以張吾軍而寒敵人之心使果懼之富平之役端本以轉運在軍婁室不畏也自是而後三戰於和尚原一戰於箭筈關一戰於仙人關皆吳玠也再戰於金州皆王彥也一戰於饒風關則吳王之合軍也二將皆萬人敵也誰肯冒端名哉是特野史附會之談

而續通鑑者無識竟采入之晉鄙之客造謗信陵固不足
致詰也且夫李光弼之涖朔方也誅張用濟余玠之涖蜀
也誅王夔古來丈人之嚴軍律未有不懲悍帥而可以期
成事者吾謂魏公下車卽當暴端之罪尸之三軍以示不
用命之罰顧乃計不出此而猶欲收其桑榆之效吾知其
無能爲也及其誅也以幕府治一部將不能著其應有之
讞而於區區文字之間誣其指斥又坐以謀反之名責其
部下張中孚趙彬之叛是則端所不受也求其罪而不當
反令死者得以有辭是則魏公之失而王庶吳玠亦與有
過焉聖政記曰端死頗爲時所惜然議者謂端不死一日
得志逞其宿憾積怨而秦蜀非朝廷所有雖殺之可也是
以有誅端之心矣嗟乎魏公之精忠足以貫日而短於才

故累舉而累蹶其蒙謗於陝中也以曲端其蒙謗於淮上也以劉光世不知不殺曲端陝中之軍令不肅不罷劉光世淮上之軍氣不揚雖有才十倍於魏公者無以成功陝中之敗以輕敵淮上之敗以失人是才之短也有明之人疎放考古襲宋史之唾餘而極詆魏公甚至比曲端於岳飛則真愚而妄者也

幽香生自性根來並蒂偏從冷處開不識人間塵土味萬花須讓此仙才此東鄰吳蘭雪嵩梁咏水仙花詩也可謂賦物親切

唐人詩可憐無定河邊骨猶是青閨夢裏人按無定河在今直隸固安縣西北十里本朝改爲永定河王阮亭池北偶談嘗辨之非陝西之無定河也河之水東奔潮汐無定

故名閩縣薩檀河大令玉衡有詩云園水東奔助瀝河流
沙濁浪此經過三春少婦青閨夢一夕詩人白髮皤古戍
連城寒落雁黃雲壓塞晚鳴駝只今雪作堤邊絮笛裡關
山客思多

丹陽縣新豐塘爲張閩所鑿陸放翁云李白詩南國新豐酒
東山小妓歌又唐人詩再入新豐市惟餘舊酒香皆指丹
陽之新豐非長安之新豐也厲樊榭鶚有詩云水落塘猶
在天寒酒可酤名句也侯官李蘭屏新豐詩云縹緲殘霞
畫遠天江村晚樹碧于煙詩人夢憶新豐酒估客帆歸建
業船張閩塘空殘照澹日蒙城近暮山連栖鴉流水新愁
地蕭瑟秋光總可憐此詩說地理確鑿亦清婉可誦

辛丑夏建甯張亨甫孝廉觴余於烏石山席間誦其友山陽

潘彥輔孝廉五律云海內論詩者餘生汝最宜欲求騷雅
合惟許鬼神知風雨蟄龍奮關山老馬遲虛堂此明燭千
載愬風期按此詩風骨老蒼養一齋詩鈔遺之何耶

張亨甫詩才敏捷辛丑夏猶子喬峰出畫石榴團扇求詩時
值海氛不靖亨甫感慨時事頃刻成三絕句各自切題詩

云南海明珠貢未聞房中百琲許誰分榴花紅抵烽烟色

五月無人割陣雲

自注時粵東逆夷不靖

一代論才見步兵

自注謂又崧叔

父菊谿孝廉

阿咸超絕倘齊名竹林實似琅玕長雛鳳飛來萬

里情老去張衡詠四愁奉揚難遇好風留元規塵滿應休

問願爾揮軍障石頭

博陵登眺圖爲張亨甫所繪題者甚衆惟李蘭屏詩極爲真
切詩云蠡吾形勝接瀛州才子幽燕話壯遊半面孤城曉

朔漠九邊衰柳曳清秋關河暮色渾宜畫詞賦風懷盡寫
愁綵筆青衫正年少可堪惆悵仲宣樓百戰山川沒草萊
登高呼酒壯懷開燕雲自抱盧龍塞蘇野遙連市駿臺流
水棲鴉寫秋思殘陽立馬話邊才

亭甫將有塞外之行

千秋潞涿英

雄地古木寒蘆照眼來清樽此日惜離羣直北愁看萬里
雲留滯周南空感舊飛騰幕府願論勲尙懷上谷良家子
能草天山露布文太息才人困羈旅坐令投筆欲從軍

西湖宛在堂祀明林子羽王孟敷鄭少谷高宗呂傳木虛葉
文忠曹節愍徐幔亭徐興公謝在杭十人乾隆初黃莘田
所立也莘田書葉文忠句爲楹帖云桑柘幾家湖上社芙
蓉十里水邊城道光四年同里紳士益以謝雙湖陳叔度
趙十五及莘田凡十四人陳恭甫先生詩云文獻百年頌

射鷹樓詩話

卷十

古

月旦蒹葭一水自風煙注云文忠相業光顯不必與詞人爭一席也當去之

余六上公車十二過露筋祠未嘗得句以王阮亭作如崔灞題詩也露筋事已屬渺茫作者豈容着相故向來作露筋祠詩總以阮亭爲最其詩云翠羽明璫尙儼然湖雲湖樹碧於烟行人繫纜月初墜門外野風開白蓮可謂不着一字儘得風流祠左偏有方池池中蓮花夏日盛開庚子辛丑余過其地猶見之至甲辰尋其池已填爲平地居民築屋其上而詩人遊眺之所已爲陳迹矣候官王未蘭上舍避暑錄謂蓮花爲露筋娘娘小字雖引書以證之殊屬非是

庚戌仲夏舟抵杭州聞道州何子貞師住西湖淨慈寺遂往

謁時師扶太夫人湖歸湖南清談數刻胸次灑然師乃出

元和顧澗蘋茂才思適齋詩文集相贈澗蘋名廣圻字千

里精於校讐之學同時如盧抱經學士段茂堂大令王懷

祖巡河錢竹汀詹事孫淵如觀察張古愚大守黃蕘圃孝

廉胡果泉中丞秦敦夫太史吳山尊學士無不兼擅其長

而澗蘋尤魁傑者也以與段茂堂先生爭四郊小學成聚

訟士論薄之詩非所長今錄其爲侯青甫畫竹及秋海棠

二絕云無端妙手掃檀欒黛色參差玉幾竿恍似平山堂

下去有人翠袖倚天寒浥露含風無限情淺紅深暈太盈

盈秋花自較春風艷不爲相思淚染成

庚戌余自從京師回過西湖訪龔昌匏國子生

太息

於錢塘

門外

國子生爲定昌菴先生冢嗣

昌匏家傍西湖

湖水

湖山宛然在目昌匏

持酒一壺呼舟子同載歷覽湖山勝景遙望六橋烟柳濯
濯依人不覺身行畫裏日夕方歸元人沈自誠西湖竹枝
詞云儂住西湖日日愁郎船只在東江頭憑誰移得湖山
去湖水江波一處流又釋道元詩云湖西日腳欲沒山湖
東月出牙梳彎南峰北峰船上看恰似阿儂雙髻鬟二詩
絕佳余爲昌匏誦之

作西楚霸王詩難於擺脫凡俗前明濟南進士王季木

象群

書項王廟壁詩

季木明萬曆時進士

爲穎川劉考功公祓所賞朱錫

鬯謂季木詩比於謝參軍鴻門作更覺遒鍊其詩云三章

旣沛秦川雨入關又縱阿房炬漢王真龍項王虎玉玦三
提王不語鼎上杯羹棄翁姥項王真龍漢王鼠垓下美人
泣楚歌定陶美人泣楚舞真龍亦鼠虎亦鼠此

出於王

鑽非人力所能至也

甄后塘上行風骨未蒼不足入古王阮亭古詩箋錄之何耶
甄后爲袁熙之妻袁氏爲魏所滅甄氏旣不能死節乃失
身於曹丕後爲郭后所讒寵愛漸衰乃作塘上行以見志
於節已壞怨之何益况並其詩亦不足存乎

養拙齋未是草閩縣曾亦廬大令

元澄

著

辛卯鄉榜

大令詩縱橫

跌宕豪邁騰驤七言古尤獨樹一幟昔陳卧子謂李獻吉
詩崢嶸清壯原出秦風余於大令亦云集中名篇如讀陸
宣公奏議南康望廬山幔亭峰下作度居庸濟州太白酒
樓放歌過清流關謁岳墳孤山訪林處士故居王彥章鐵
槍歌秦良玉戰袍歌等篇皆能蹂躪高岑之室騰蹕何李
之堂其度居庸云居庸要險天下絕一關南北炎涼別四

山疊翠入寥泚猩猱怒嗥蒼石裂不知何年六丁掣黃雲
匝地蟠拳鐵我車輪敝石欲齧我馬力疲蹄屢跌太行羊
腸同一轍懸絙莫上攀籐碣雄關自昔天險設一夫當之
萬夫折天門虎豹守周鑄石鼓雲雷森布列壯遊天外雄
心熱關山放眼高歌泄戰場前事輕胡羯土木沙蟲幽恨
結折戟殘戈繡花襖斑斑猶認將軍血我朝坤軸歸提
挈夜柝無聲關吏撒九泥不事峭函閉遊鞭直許崆峒揭
駱駝背穩雁飛瞥吟聲度出長城窟秦良玉戰袍歌云大
星夜隕我眉巔錦袍終古留蠻天上有將軍百戰血刀瘢
箭垢餘腥膻將軍本是秦家女夫婿威名官石砭首帕弓
韉蠻樣妝銀鞍繡繖軍容武請纓首策播州勲廿年南北
提孤軍骨肉重傷新馬草烽烟恐檢舊鴛裙旌功詩錫平

臺召四川營奉思陵詔兩字勤王銘背新一團宮錦從天
耀承恩馬上促戎裝萬里封疆仗女郎督帥攘功誇蟒玉
監軍索賄侈貂璫吁嗟三百年天下驅賊縱賊成解瓦白
桿來時勢一空錦袍識處誰當者半生報國障夔巫愧死
鬢眉六尺軀奮袂勇攀渠帥纛解衣分給一軍襦竹箇坪
前鼓聲死張令不還事去矣十三要隘圖成虛二萬峒蠻
議旋止西川老去拂衣歸此袍此日無光輝風沙襟上懸
蠻血金繡燈前痛賜緋君不見左家甯南一男子冠裳掃
地九江恥通侯劍履委塵灰孱婦釵鈿芳頰齒又不見梅
花嶺上袍笏寒騎箕人去埋衣冠何似夫人城健在獨遺
巾幘後來看

詩有煙火氣則塵有脂粉氣則纖有疏荀氣則儉無是三者

而或矯同立異或外強中乾則亦爲餒而爲敗故詩不可以無氣而氣尤不可以襲而取不可以僞爲其氣逸而雄清而壯者漢魏以來少陵一人而已蘇子瞻云天下幾人學杜甫誰得其皮與其骨皮且不可得而況得其神髓乎哉此無他骨不靈而氣以頽心不俠而氣以懾雖日取杜詩而讀之而去杜益遠矣

東薌吳蘭雪刺史

嵩梁

香蘇山館詩鈔其入廬山諸詩模山

艸水可稱作手余尤喜其九峰閣諸詩有繪影繪聲之妙其由東城阪入九峰云久晴西風雨久雨西風晴我信野人語遂作看山行行行渡溪橋步步皆雲水我愛流水聲人行白雲裡雲裡有人家柴門臨水斜門前怪松樹屋後高梨花梨花高入雲一白迷行路廼風送香來始悟花開

處九峯閣詩云九峯有高閣嵯峨與雲平峯峯殊向背日
日兼陰晴一峯雲漸吐裊若炊烟輕曾合爲大雲積氣巖
壑輕長風天上來驅雲山亦行一雲相往來九峯爭送迎
雲氣釀爲雨咫尺銀河傾見雲不見水震蕩風雷聲雨收
雲緩歸徘徊若有情萬松隱斜照紫翠不可名我爲看山
來山下雲又生詩亦如白雲隨意爲縱橫此詩置之坡翁
集中未知鹿死誰手

辛丑夏兒子慶煒持筴子索張亨甫孝廉書亨甫口占絕句

贈之云東坡早見斜川慧洗馬真如樂廣清

世兄爲劉炯甫上舍婿

願爾著書如汝父不妨談笑薄公卿四兒慶銓亦持筴子
求書孝廉復成長律書筴上末聯云子皮家事如吾聽一
與傳經一授詩援筆詩成不假點綴

男慶煒

射鴈樓詩話卷十一

侯官林昌彝惠常輯

絕句二十八字耳貴在神味淵永情韻不匱 國初翁山漁
洋而後惟厲樊榭及吳蘭雪二家爲勝今錄樊榭絕句尤
佳者如花塢二首云法華山西山翠深松篁蒙密自成陰
團瓢更在雲深處惟有樵風引磬音白練鳥從深竹飛春
泉淨綠上人衣分明孟尉投金瀨吟到日斜猶未歸冬日
雜詩二首云霜酣櫨葉一村明茅屋高低烟火生多事牆
頭烏白鳥夜闌相荅紡車聲水邊僧屋利竿雙饑鳥窺人
上石幢解向西風吟落葉黃金合鑄賈長江人日游南湖
慧雲寺七首之三云禪房鴨脚脫層陰定破關門芋火深
至竟繁華歸夢幻最無人處叫春禽題對山開卷樓壁云

僧樓恰對惠峯開
寒玉泠泠步履回
待與山靈話疇昔
杜鵑紅處我曾來
寶應舟中月夜云
蘆根渺渺望無涯
雁落圓沙幾點排
明月墮烟霜著水
行人今夜宿清淮
懷徐丈紫山客金
陵二首之二云春
分彈指又秋分
記寫新詞篤
轉熏今日秦淮歌
板絕僧樓應夢馬
湘君今年春分同紫山賦綺羅香
春寒云漫說春衣
浣酒紅江南三月
最多風梨花雪後
酴醾雪人在重簾
淺夢中雨後寫望
云風敲病葉入疎
櫺雲破寒山數筆
青十日鼓琴晴始
出夕陽依舊滿迴
汀嚴朗屋寫小像
爲杜子春事索題
四首之四云君如
夷甫不言錢卻采
虞初入簡編歸去
但尋梅尉女挑燈
細話小游仙東扶
送水仙花五本時
臘月七日雨中云
春思於花亦太廉
一花一葉一愁添
肉人不合尋常見
燈影娟娟雨半

簾梅雨經旬得遣懷絕句六首之三五云龍公一剎破慳
多即漸空原展綠波十角吳牛三尺鉏棟花點點響烟蓑
舊種垂楊綠埽磯北風將雨上漁扉前村半入空濛裏雲
帶炊烟溼不飛西湖春雨四首之一三四云冥冥苦霧溼
堤沙店舍無人酒幟斜已是祠山生日過小梅猶滯雨中
花

杭俗以二月八日爲祠山張真君生日必有風雨

無賴東風轉柳條雨從月額

到花朝少年記得嬉春事斜日衣香第四橋遙峯隱見黛
睂攢怪底春來無此寒朋比熏爐風味淺有人樓上倚闌
干獨游滄浪亭五首之五云回首疎籬帶綠莎歸來猶唱
濯纓歌城南一路供悵悵老木平田占意多聖幾送漳蘭
二枝二首之一云垣侵薜荔徑蓬蒿零落幽叢夢想勞忽
見微波小翹楚勝歌二十五離騷

孔行素至正直記明雪窗畫蘭法有大翹楚小

翹楚

題周兼南唐小周后寫真四首云未合雙鬟最小身

秦淮明月白門春溪宮莫話昭陽事更有人閒返臥人已

識君王尙待年新詞側艷外邊傳銷魂貌出提鞞樣壓倒

南朝步步蓮羣花偃亞小亭孤卯酒朝酣倦欲扶可記畫

堂南畔見背人無語問流珠命婦隨朝掩淚光虛聞龍袞

紀興亡畫師自有春風筆不寫傷心入汴梁

龍袞江南野史今所傳不

全載小周后事見王銍默記

南湖初夏四首之二三四云委巷人歸路

屈盤苧衣初試尙嫌單斜陽半落湖光裏一陣蘋風助麥

寒壞垣桃李自無蹤記得輕船對罨泥看到濃陰春又夏

人家斜倚采桑梯疎放都無客過存五經籬外曲通村紅

薺十丈開還落臥讀叢書不出門吳興月河雜題五首之

二云溪閣誰家有笛聲釣游無處不關情水雲寥落暮天

出青翠數峯城上明西湖柳枝詞六首之四五六云芳草
春來斷客魂楊枝只合伴桃根滿湖碧水游船散西月東
風在寺門闌盡纖腰一兩枝水仙王廟日斜時青青不許
游人折細葉如顰更泥誰路旁烟態罨朱樓長送行人干
里游願作湧金門外樹生來渾不識離愁二月十四夜同
周少穆胡又乾施竹田吳敦復汪旭瞻施北亭西湖汎月
共賦四絕句之四云月下看花不肯紅沿隄花影壓孤篷
春烟夜半生波面髣髴青山似夢中汎舟鑑湖四首云秋
波渺渺碧無泥雲樹參差望不齊喚得烏篷新艇子好山
都在鑑湖西放翁宅外賀家莊時有游船繫柳椿莫學三
山但成隻阿儂最愛住湖雙湖桑埭一名湖雙以柳姑席
有東南兩筴湖也俯蓼花洲獨處無郎俗誤愁烟縷乍消漁市散一峯臨鏡

學梳頭

柳姑廣向只女像
今俗誤偶以男

露冷紅衣已卸香鏡心何處出

新妝菱歌未斷西風起八月涼於五月涼初夏汎舟至孤

山云弄晴小雨落餘飛水外西峯未夕暉滿地綠陰春去

後幽禽猶道不如歸雨泊桐扣二首之二云三更雨歇冷

于秋翦燭題詩劇未休四面亂蛙聲裏坐不知身在古杭

州西湖競渡曲四首之二云竹風葵日共鮮新向午湖亭

扇障塵試爲樓家參轉語八分烟水二分人

二分烟水八
分人樓玫瑰

西湖競
渡句也

午月淮陰城北觀競渡四首之四云吟朋應是憶

天涯舊曲樽前小字斜

兩寅午日與歐亭敬身
諸君湖上賦競渡曲

猶有浴蘭

遺俗在晚來門過賣漿家寒食湖上治春絕句七首之二

三云清繞橋迴澗壑長春淙亭下踏春陽越溪一尺西家

髻壓倒吳中時世妝猛雨豪風不奈何誰教龍忌得晴多

桃花薄命成僥倖腸斷佳人愛愛歌題穆門老正中秋夜

汎詩畫卷三首之二云

畫爲華秋岳筆

老我吳船易感秋秋燈秋

月幾曾游夜來多少行雲影不夢間邱夢虎邱趙氏西池

看海棠同施自勗作三絕句之一二云花中戚里此稱奇

淑態穠姿想見之莫笑杜陵窮相眼麗人行卽海棠詩

壯丹榮辱志以海棠爲花戚里

亦復奇顛擬放翁名園可惜鎖東風與君

臨水偷看處定愛深紅愛淺紅

閩縣薩檀河先生

王衡

著有白華詩鈔四卷瑰瑋勗皇沈博

絕麗如鸞翔鳳舞樂奏鈞天幾欲跨其遠祖雁門集而上

之陳恭甫先生評檀河詩云駿偉廣博譬諸快劍長戟之

撞搃黃鍾大呂之鏘洋大瀛吹波魚龍出沒沃日蒸霞萬

象澍滉建章神明嶢嶢瑰麗銅鳳金爵照爛天表昌彝謂

先生之詩學人之詩也才足以副之亦梅邨竹垞之流亞

也九仙山云勢分鳥越鼎三山騎鯨真人何日還樓閣春

風明海島旌旂夜月擁仙班巖頭馬去雲千縷池畔鴉飛

水一灣上界鐘聲下界度遊人指點暮煙間將入都別家

兄敬如云萬里風霜一劍單高堂白髮遠遊難明知布被

原奇暖且說綈袍可救寒貧子正當行色晚衰親怕有淚

痕看銷魂況是江頭路莫向范茫感百端東阿懷曹子建

詩云客子由來最畏人曹子建詩客子由來最畏人風吹更作

轉蓬身子建詩轉蓬身一家父子思袁紹當日君臣怨

灌均西館無媒躬自賁東藩有路分難親魚山清梵尋來

杏詞賦千秋望洛神離騷求處妃之所在柴市云黯澹塵

沙畫不開崖山風雨至今哀白鵬有恨臣南拜殊鳥何心

冠北來十義風高留石塔三台星折暗金臺祥雲早入生
前夢無媿臚傳第一才登北固山云蕭公北顧此名樓坐
攬江南二百州暝暝黑帆瓜步出沉沉白日蒜山浮大兒
古有孔文舉生子今無孫仲謀不盡登臨孤鳥迴廣陵城
下暮潮愁聞蟬云煩君相警見天真黃葉西風幾愴神壯
志誰甘銷日暮清吟我亦在山貧離騷以降無秋士小雅
當時有舊人臥病空堂情易感斜陽半樹帶關津舟中望
金陵懷古云牛女輪潮水府開茫茫天塹拍天回銅街五
馬人南渡鐵鎖千尋帥北來叔寶言愁何日遣豫州擊楫
至今哀斜帆影落秋江冷建業西風一雁催金川門感懷
云當年一炬照江關禾黍秋風客淚潛虎踞從來圖霸地
烏朝淒斷侍臣班尚書第宅牛羊散博士祠堂草薶斑七

國不平果誰咎至今遺恨滿鍾山鍾山下弔福清林那子

先生云藹窩終荷故人恩

先生自作生曠曰藹窩後周樂園爲營葬

風雨傷

心白下門苧帳老愁孤鶴影

施思山嘗貽苧帳詳見其詩序中

麻鞋生拜

杜鵑魂乳山客去書應散

先生亂後居金陵乳山袁漢雲推挽詩有娛生書未賣之句

洞仙歸道更尊

紫雲洞在福清石竺山下真人林元光煉丹于此

一代才名垂後

一死松杉長傍孝陵園秦淮客舍對菊云九月秦淮水閣樓

離離霜影使人愁世無東晉陶徵士客本南朝沈隱侯病

骨難禁今日酒好花不是故園秋從來節物吾多感風葉

蕭蕭更滿樓彭衙書院對菊云

徐少府所贈澹到無言瘦亦宜

每當秋至每相思酒盃在世無彭澤詩骨如君到義熙一

擲田園逢笑罕十年心事此花知殷勤難忘徐君美爲政

風流見在茲七夕漫興云玉露金風冷畫屏南來愁見五

秋螢才非服輓名何益織不成章涕獨零世路艱難甯一

水人生離合悟雙星今宵仙會能多少漏箭休催轉翠幃

銀漢無塵靜不波鸞笙鳳管喜相過人間大有新婚別世

上爭如長恨歌水挽西流誰洗甲眼枯南望淚成河

逢佳節婦子聚哭郊外蓋遺戍者多而南山之陣亡亦衆也須知桂殿高寒甚獨宿姮

娥日月多弔福衡墓云非關懷刺渡江來歷歷晴川楚樹

開堰近鷓鴣誰得句洲荒鸚鵡恨無孟孔融不薦真知已

黃祖能容豈俊才猶想岑牟搥鼓壯誰憐七十二墳灰泊

舟湓浦口云楚天漠漠水迢迢人事音書兩寂寥彭蠡祗

今無過雁潯陽自古不通潮渡頭鴉起明霜葉山腹人歸

辨雪樵今夜月明絃語絕孤舟何處訴漂搖

家文忠公少穆先生於道光三十年二月旋里余于七月從

京師歸先生時相過從兩招遊西湖拜李忠定公祠欲立
湖上詩社未幾粵西匪徒滋事奉 旨爲 欽差大臣十

月初二日起行至漳州得下利疾十九日薨於潮州普甯

縣閭中人士下至傭夫婦孺輩無論知與不知莫不爲之

泣下宜黃陳少香先生哭先生詩云八桂干戈日三朝社

稷臣登車猶力疾拜表已忘身出處關天下安危繫此人

何當悲薤露遺憾滿征塵天地黯無色原頭夜落星一生

完大節九死出邊庭

公會戌西域

古驛燈微碧芳郊草自青故

鄉遙隔處風笛咽郵亭余友王偉甫孝廉

廷俊

輓先生詩

云蠻烟寒壓嶺頭梅一鶴冲天去不同

先生嘗爲其太公賜谷封翁繪餉鶴

圖國蘇籍

萬衆愛同慈母德三朝望重老臣才星沉大海

蛟鼉伏月黑邊營鼓角哀未掃欃槍心未死英魂猶繞陣

雲來

前明李空同泰山詩雄偉稱題其詩云俯首無齊魯東瞻海
似盃斗然一峯上不信萬山開日抱扶桑躍天橫碣石來
君看秦始後仍有漢皇臺此詩明詩綜何以不選耶近又
讀福山鹿木公望岱詩愈覺清超高渾五言長城于今再
見其詩云山亦有天縱極天天讓青渾然得元氣何自識
真形高鳥莫能過片雲都欲靈未知凌絕頂可得摘秋星
五世祖德榮公同里宗後學萬忠填諱世居長樂沙堤邨父又章公工
詩著有種德堂詩集公通武略登崇禎庚辰進士授職累
功陞總戎會成功據漳州公將往投之姚鄭宜人牽衣泣
諫公曰吾誓以死報國不願生還也拔刀斷裾而去公臂
力絕人所持長矛六十觔馬上飛舞當者皆披靡軍中號

爲林家某年某帥兵二千餘攻漳州紅花埠七寶砦砦
每屯萬人勢甚張公奮勇直前日奪六砦至第七砦攻圍
益亟天色近暝不之防猝爲佛郎機所中人馬灰燼長子
端駿從死成功聞警哭之慟曰天平喪吾一臂矣死之日
魄見於家戎裝危坐指麾家事家人咸泣拜不能起移時
始沒後兒輩有病魔者恍惚見公自外歸捽髮寸磔之闔
族驚以爲神至先祖時猶歸來三次遣怪其英爽歷久不
衰若此家景福布衣林家某歌七古中段云此某臨陣久
無敵所向披靡人莫當紅花埠外雷電震七寶砦上軍聲
揚王家鐵槍薛家箭以某相較誰爲強讀此詩可想公之
神勇

秀水朱竹垞鴛鴦湖櫂歌一百首搜羅極博其詩旨趣幽深

神韻獨絕七絕中上品也余嘗精選若干首時為諷咏云

春城處處起吳歌火岸疎簾影翠娥一葉舟穿妝閣底傾

脂河畔落花多傾脂河在楞嚴寺東西埏里接韭谿流一

簣餅山古木秋慣是爭枝鳥未宿夜深啼上月波樓西埏里載

于寶搜神記在嘉興縣治西韭谿之水經其下餅山宋時

酒務月波秀州酒名載張能臣天下名酒記樓係合狐挺

所建宋人集題橋李亭荒蔓草存金陀坊冷寺鐘昏湖天

夜上高樓望月出東南白苧村橋李亭址在金銘寺北宋

著金陀粹編寺南女牆官柳遍啼鴉小閣臨風卷幔斜笑

指孩兒橋下水雨晴漂出滿城花孩兒橋在天寧寺東石

龍括桃花新水湧吳艚十五魚娃櫓自操網得錢塘一雙

鯉不知魚腹有瓜刀錢塘杜子恭借人瓜刀其主求之曰

魚躍入船中破魚腹金衣楚雀白鷄雞不住裴公島上啼

白馬未嘶雲屋外紅船先度板橋西

裴島即放鶴洲村相傳裴休別業

村中

桑斧響初停溪上叢麻色漸青郡閣南風纔幾日荷花開

滿鏡香亭

府城西北有麻溪鏡香亭在慈恩寺南今廢

天甯佛閣早春開鳥語

風鈴次第催怪道回船濕羅幃嚴將軍墓踏青來

天寧寺在秀水

縣治東北後有嚴助墓

秋燈無燄剪刀停冷露濃濃桂樹青怕解羅

衣種鷺粟月明如水浸中庭

禾中產鷺粟相傳八月十五夜伴女郎解衣播種則花倍

繁繡綫圖存陸晃遶唐家花鳥棘鍼描只愁玉面無人畫

須是傳神盛子昭

陸晃天人有繡綫圖載宣和畫譜唐希雅及孫宿皆善畫花鳥墨作棘鍼子昭

魏塘人嘗畫崔鶯鶯像

比翼鴛鴦舉權迴雙飛蝴蝶遇風開生憎湖

上鷓鴣鳥百遍魚梁臚翅來

鷓鴣湖在鹽縣西南

龍香小柄琵琶

彎切玉瓊瓏約指環試按花深深一曲海棠開後望郎還

南宋太學服膺齋上舍鄭文秀州人妻孫氏寄秦樓月詞一時傳播酒樓伎館皆歌之載古杭雜記花深深海棠開

後詞中語也琵琶魚梁水淺鷺爭淘處處村田響桔槔一夜

城西苔水下酒船直並小樓高馬場漁激幾沙汀宿雨初

消樹更青最好南園叢桂發畫橈長泊煮茶亭彪湖一名場湖宋潘

師旦以南塢漁激水十一處會於春波門外建會景亭南園余叔宜春令別業有桂樹四本高俱五丈蘇子瞻煮茶

亭在北鸚鵡湖流碧幾灣白龍湫水落陳山游人秦小娘祠

過社鼓聲邊醉酒還鸚鵡湖卽柘湖陳山上有白龍湫見括異志秦小娘晉時人祠在平湖縣

東南二輕船三板過南亭蠶女提籠兩岸經曲罷殘陽人

不見陰陰桑柘石門青崇德古南亭石門春秋時吳壘石以拒越移家只合巽

川居釀就新漿雪不如畱客最憐鄉味好屠墳秋鳥馬嘒

魚問人卓成大元末僑居巔川馬嘒城殆卽水經注所云馬羣城也魚可爲腊稗花楓葉宋坡

湖路轉潮鳴山翠無百里鹽田相望白至今人說小長蘆

宋坡湖卽黃湖吳郡記海濱廣斥鹽田相望懷蘇亭子草

成蹊六鶴空堂舊蹟述惟有清香樓上月夜深長照子城

西

懷蘇亭在府治六鶴堂宋知州鄧根建府廨有清香樓見異聞總錄子城載間牕括異志今日爲子牆脚

陸放翁云東坡詩清吟襍夢寐得句旋已忘固已奇矣晚謫惠州復出一聯云春江有佳句我醉墮渺莽則又加於少作一等近世詩人老而益嚴蓋未有如東坡者也學者或以易心讀之何哉

詩有家常語愈質而愈妙者如福山鹿木公先生

林松歸家

喜友人見訪云煙火閒空竈妻兒住外家蓋客初到家而眷屬在外家尙未歸也可與洪穉存太史亮吉詩妻常歸甯兒罷讀同一入妙

宋詩之不及唐者以其少沈鬱頓挫耳然亦自成爲一代之詩不可偏廢也昔人謂詩盛於唐壞於宋及劉後邨謂宋

詩突過唐人皆非確論方正學詩前宋文章配兩周盛時
詩律亦無儔今人未識崑崙派却笑黃河似濁流所論亦
未的

翰墨香黃忠端公園中荔枝也忠端旣謫圃中石旁茁荔一
株十年生實三百六十五枚味甘色潤其香如墨故名每
歲如前數及忠端鄉薦捷南宮入翰林俱倍之先生卒樹
亦枯見省志及陳鼎荔支譜陳恭甫先生有翰墨香詩節
錄之翰墨名香天下寶花實周天通易道華采曾同忠獻
榕禎祥孰數科名草所以紀其異也

古人偶爾賦物而人品心術更自流露於翰墨之間王介甫
烘蟲詩云猶殘衆蟻恨未除自許甯能久安臥蓋其生平
忌刻剛愎亦略可見矣司馬公和章便自不同所云初雖

快意終自咎致爾殲夷非爾過竟是忠厚自反之意又云
醯醢聚蚋理固然爾輩披猖我當坐但以努力自潔清羣
蝨皆當遠遁播正本清源自是賢相含容化導手段所謂
君子遠小人不惡而嚴也二公學術相業不同詩亦判如
冰炭言爲心聲可不慎歟李蘭屏苦蚤詩摹寫情狀不欲
存殘刻悲怒之念中段云么麼聚羣蚤衿袵方跳踉喋膚
巧擇肉啖齧生背芒解襦苦搜邏感嘆依匡床汝生一蟻
化瑣屑如秕糠安能千金軀充爾蟻蝨腸愧乏蛾眉姬敷
英席芸芳又無鳥爪仙爬背客情狂使爾便垢浣呼儔遂
披猖又云痛癢固自切堅忍知無妨豈當芥吾胸終夕爲
爾怵心泰物不擾俯仰方兩忘此則不悖溫公作詩之旨
閩中近代詩家足以雄視海內者閩縣則龔海峯景瀚薩檀

河玉衡謝甸男震陳恭甫先生壽祺也侯官則許鐵堂友

林暢園茂春李蘭屏彥彬也建甯則張亨甫際亮也光澤

則何金門長詔也福鼎則林紉秋滋秀也皆從已歿

鄭少谷詩似杜亦須分別觀之讀者不可隨聲附和少谷詩

學杜者五七言近體也若古體則出入漢魏初盛中晚宋

元諸家遍讀全集五七古似杜者頗少說者以少谷無病

呻吟並題目亦多摹杜殆非持平之論

雪樵集四卷福山鹿木公先生林松著先生詩憂憂獨造大

有妙悟迥異尋常境界南海張南山謂木公先生詩可以

質諸張水部賈長江以入主客圖當是入室弟子余謂先

生詩字字從心坎中說出與持身涉世之理都有關係是

能以香山之性情運少陵之氣骨者也其五字苦心得詩

則真宰上訴天應泣也五字苦心得云五字苦心得原非
衆有聲海枯尋欲出天遠聽還驚夜茗泉根煑秋參雁背
橫聞仙猶少日鬢雪已莖莖五字無心得云五字無心得
得時心轉猜忙邊捉難住間裏忘偏來鳥聽百千嘒酒傾
三兩盃長吟忽不覺花落滿蒼苔贈步武云先生性寡歡
半世苦吟寒力却千金易輕拋一字難雁邊秋葉滿鐘外
曙星殘誰見無人處凝思獨倚欄苦熱寄孟柳谷云高鳥
遁無迹火雲燒徹天何人能作雨所觸欲生烟睡起北窗
榻汲枯鄰井泉誰能脫塵鞅銷夏却如仙過友人山居云
石磴懸泉響草堂深樹平性孤與僧近吟苦較猿清隔嶺
歸樵影敲簷墜果聲漫疑久無語語出恐人驚秋夜云醜
女嫌明鏡佳人愛素琴若非真悅已未可與談心瞑坐月

沉海寒蹤鶴步林移燈照孤影秋夜一何深龍山驛晚行
有懷云千古龍山驛我來秋氣清隔林無犬吠落葉覺人
行石磴霜初滑酒家鐙尙明感懷蘇玉局馬足此偏輕冬
夜懷李鬲雲云老屋正枯坐遠鐘聞夜撞梅花不滿樹參
影忽橫窗其火煨山芋松醪凍瓦缸長思聞仙句吟其李
才江寒夜贈店主人云遠柝凍無響獨眠中夜興馬餐空
櫪雪人語小厨鐙別憶家鄰海寒凝骨換冰一尊能醉客
何必是蘭陵鏡中見白髮漸多云幾日忽如此將來知若
何豈余爲客早獨爾得秋多野寺疏鐘斷荒城遠雁過秋
根拔不易掩鏡且高歌讀李五星詩呈宋步武云得白海
僧手藏之懷袖深有時邀鶴聽竟夜倚松吟峭骨無多肉
閒情亦苦心逢人莫輕說未易覓知音立秋夜同星船先

生云露坐入深夜不知秋已生感人先以氣到樹尙無聲
冰水調初懶荷衣著漸輕却緣爲客久忽起故園情秋夜
書懷云士貧如醜婦不敢乞人憐本自羞明鏡况兼非少
年一砧入遙夜片月下蒼烟誰憶停琴坐古牆蟲語邊過
友人有贈云天意愛名士故教餐菊花病妻守空竈飢鼠
去鄰家未老頭先白長吟手自義無人知古性門掩有誰
搗螢云耿耿何爲者星星出晚晴鐘疏烟際寺樹暗水邊
城感爾有餘照恐人嫌獨明蒼茫月初墮前路慎孤征同
周二南夜酌云若使竟無用不應生此才斗間騰劍氣爨
下失琴材古屋懷人坐秋燈聞雁來吟深天向曙且復盡
餘盃單平仲明湖分韻得分字云湖上待明月月來無片
雲舟移逢柳住酒滿借盃分露滴吟邊覺荷香靜裏聞不

知曙鐘動驚起白鷗羣病中客思云酒薄難成醉衾寒強
就眠夢迴蕉葉雨病過菊花天喜事眞爲累無求卽是仙
明晨歸計決廩藥翠微邊雪夜同內子云門閒客不搗烟
火在鄰家大雪欲埋屋有人方績麻一鐘來莽蒼幾樹凍
查牙時復敎兒讀頻挑燈上花過山村云數里細泉響幾
層迴磴斜草香半疑藥樹老故遲花聚族始何代衆鄰如
一家老翁抱孫至畱客飯胡麻過高密訪五星丹桂云並
世有郊島雲山獨往尋寒燈春夜迴靜語草堂深酒罷惟
枯坐鐘餘更苦吟千秋容與共不負此生心高密道中感
王熙甫侍御云憶在京華日直聲天下聞謂余獨殊衆此
士可論文身後詩名出生前諫草焚擬尋舊吟迹隔嶺斷
歸雲九日同友人登堂邑城云曠無登眺處城卽當高峯

擬此酌佳節因之倚短筇
蓼花微雨渡黃葉夕陽鐘
莫動家園思雲山隔幾重
堂邑答步武見寄云五字
寄初到焚香折遠封吟深
何處夜來度幾城鐘凍雪
明枯樹停雲隔晚峯憶從
去年別兀兀又殘冬載酒
過友人庄云送春猶剽酒
乘興過山家村暖鳩啼樹
溪晴鶴步沙坐看穿徑笋
吟對隔籬花歸去鐘聲送
長林晚照斜秋夜云未覺
秋來早懷人枯坐時夜長
偏少睡貧極轉多詩難貰
一盃酒新添雙髻絲隔窗
忽啾唧此意草蟲知呈孫
淵如觀察云萬古著胸次
春風生齒牙細流成大海
幽賞到寒花教和舊吟句
約嘗新焙茶藏書讀無盡
真似鄴侯家感事寄懷袁
明府云爭說公無渡揚帆
自不疑誰知破舟處卽此
得風時叫月荒雞早度雲
老雁遲教人憶陶令松菊
臥東籬客

夜云槭槭客庭樹未秋先變聲疎風到孤枕涼月滿荒城
漂泊懷鄉井平安賴友生亂峯烟正合何寺曙鐘鳴歸家
喜友人見訪云落落遠歸客柴門誰肯搥感君渡秋水邀
我步晴沙烟火閒空竈妻兒住外家不嫌終日坐鄰酒幾
回賒過海上友人居云海上全家住開雲種藥田潮聲飄
屋瓦蜃氣襍厨烟閒數島邊鶴吟看天際船抱琴轉無語
知是憶成連別內子云念我在家日一年能幾時暫歸轉
如客難住又臨岐老樹秋先覺寒門汝獨持紡聲入深夜
止有月明知大雪次德州云大雪平連海層冰凍徹天懷
人趙州北落日徧河邊小酌醉孤影殘燈照冷眠未明驅
馬去野色散蒼烟雲中送客歸河南云遠道暗風雪南歸
衝曉寒典琴別燕市携枕過邯鄲世味老方覺閒居貧亦

安河聲與嶽色再出料應難舊山云蓑笠滿烟雨跛驢還
舊山亂泉下巖磴深樹掩柴關蔬笋有真味妻孥無愧顏
漫嗟爲客久猶可半生閒有感云舟車誰始造不怕阻河
山直欲天無夜何時世暫閒風濤常破胆塵土屢汙顏幾
輩英雄骨銷磨向此間寄懷牢默人云所得非今有合無
入處居博徵新識字細補舊亡書苔上支床石松生缺瓦
廬早知貧與病近日復何如將赴閩中留別家兄南溪先
生云縱使長歡聚一生能幾時况無多骨肉又此遠分離
臘盡知應到書回恐故遲那堪向岐路未發問歸期金山
云金山一拳石雖好未崢嶸幸據長江勢遂邀千古名岷
峨來暮色淮海接潮聲遊客知何恨狂詞應盡驚過仙霞
嶺有懷云三百六十級撥雲雲不開近天人未覺隔嶺雁

初回吳越江聲盡閩甌海氣來獨憐無驛使誰寄一枝梅

澤兒初宰政和云爲今年猶少家傳祇守貧官田秫方稔

縣市筍長新喜事無循吏好名非愛民

昌彝按二語至言

雲根有

遺蹟千古倍嶙峋

朱韋齋先生爲政和尉建雲根書院於黃熊山上遺蹟猶存

贈朱曉

帆云冷性難爲熱棄官如棄瓢年來此孤與門外幾春潮

倚杖看巖鶴長吟答野樵自言無磊塊有酒亦須澆由臺

灣內渡抵廈門有訪不遇云鹿耳連宵別鷺門初日開潮

疑浮世轉人覺到天回舊雨尋無迹秋風颯欲來袖携郊

島句吟罷自傾盃澤兒之官嘉義云棒檄之官日羣生行

命時况經新戰伐恐有舊瘡痍

謂林爽文之變

海雨潮通港村烟

笋過籬鷓鴣聽格磔啼偏隔林枝答客問臺灣之遊二首

云前古人稀到重洋我獨經頓忘幾潮汐所見一空青海

外有餘地天東無盡星直疑是員嶠何處訪仙靈燠多寒

少處天氣覺長晴瓜自杪冬熟其地西瓜十二月熟日從中夜生烟

深烏鬼井

紅毛命烏鬼所鑿

潮逼赤嵌城

荷蘭所築今爲安平鎮

誰見携吟

杖珊瑚籬外行

綠珊瑚有枝無葉槎枒如珊瑚

張南山云綠珊瑚三字間所未聞

贈李明府云一官如處士名姓少人稱縣僻村連郭齋

寒硯有冰藥分散衙吏書答隔江僧止此心常足飢來飯

一升贈蔡老人云八十桃花色葛天餘此民千家有忙事

一杖獨閒身丹訣不傳子靈符時與人麻姑幾相見懶問

海東塵贈友人云久病書難讀長貧心轉閒全家都愛鶴

一杖不離山拾果猿隨往訪碑僧送還幾回琴弄罷泉響

夜潺湲得謝星階書云家與君鄰住臨溪並竹扉有時一

觴醉盡日衆峯圍別後各爲客年來同未歸園紅正堪憶

柿葉滿秋輝。澤兒燕中。信來喜得孫寄之。云鬢雪罷晨梳。
長安信到。餘老當抱孫。日喜勝得兒。初湯餅聚嘉客。雲山
懷舊廬數年。我猶健。聽讀祖傳書。憶爾在京邑。我爲中嶽
遊。每聽千里雁。想見九門秋。賴有書堪讀。原無貧可憂。片
言此封寄。明月正當樓。寄西園舍弟。云破榻與穿硯。抗懷
風雨廬。病猶撐傲骨。老不讀閒書。終古誰知己。片言時起
予。翦菰秋欲晚。此意復何如。句如苦吟云。草堂終日坐。白
髮少年生。明湖有約云。昨夜鵲華雨。滿城楊柳烟。游五龍
潭。贈柳研慮云。水心乍明晦。龍氣襍陰晴。觀鄭柳田作畫
云。定知胸有竹。難免鬢成絲。有感寄孟柳谷云。林影秋烟
積。岩聲夜雨過。雨夜間笛云。鐙邊烟霧羃羃。蟲外雨瀟瀟。同
宋步武夜坐云。落落相對影。惺惺無着心。同步武讀詩云。

鶴眠魂不昧石立骨無溫臘盡歸家云兒嬌書恐廢歲歉
酒難賒爲張鈍夫刺史作云穿林歸晚犢隔水聽鄰春贈
五龍潭研慮上人云神濕春澗蘚龕高夜擁星雪中得友
人書云枝鳥凍欲墮渚雲寒未開除日村外云遠樵峯頂
下賤雪屋根明春日村居卽事云野寺烟微動溪橋春暗
催許道人山居云逕深多礙竹院淺不連村同李靄溪諸
君明湖泛月訪醉琴道人云漁燈出蘆小人語隔荷深早
秋夜坐寄懷盧坡云影孤清露濕吟苦近鄰知此鄰亦別復不俗別
步武云亦知返家好祇覺別君難懷李五星云集刪今有
句老守古無貧爲高士寫生憶友人村居云田荒耕曉月井淺
汲秋星宿聊城云隔樹辨孤驛踏水沽凍醅雪中寄二三
吟友云筆鋒寒易挫酒價貴難沽小村書事云無恥不爲

別有山仍出雲秋日有懷云吟苦葉辭樹眼輕蛩近欄訪
李道士云鶴引穿林徑泉漂出洞花舟過平望云鐘邊吳
寺遠雲外越峯多贈老漁云自言生便拙獨此老猶能客
夜書懷云衣薄霜欺客燈孤蟲近人舟次聞岸上書聲云
江城寒欲雪鄰舫聚疑村春日政和城外云鷓鴣烟滿樹
蘆櫓雨連村題政和山堂云山靈無蠢石樹古不多枝安
平鎮晚渡云潮衝橫港斷天帶遠帆晴又蜃氣擁高樹夕
陽開戍城題法華寺云樹棲天外鶴門掩月中潮秋日寄
懷范鏡秋明府云西風偏渡海白髮不饒人贈臺灣邵菴
疇司馬云官閒兼隔海吟苦獨成家飯熟鳥窺竈酒空人
枕壺鄭公死願爲酒壺可云奇想使見木公此五字定當把臂入林是酒壺又多一絕妙典故雲根書
院卽事云掃地安書几羣峯倚縣門送朱菊人明府臺灣

內渡云潮落日生處島懸天盡頭贈彰化吳樸菴明府云
僧留春夜茗衙散海天鐘村居云嶺雲拖雨重溪柳受風
疎閒居戲贈友云事到拙邊少山從閒後青雪夜有待云
茶烟在茅屋晴雪滿溪山漢江客思云楚江新有雁孤客
遠投人又暮色青楓浦秋聲白葦津舟次岳陽樓云漁浦
誰家笛巴陵獨夜舟瀘溪舟中云絳高帶雲影灘急掩雷
聲又夾岸雜花滿立煙雙鷺明客中晚眺云尋磬到僧舍
渡海逢酒家蘭陽有和云沙氣連城白河聲帶雨高懷李
喬雲長安云傲骨貧仍在名心老漸疎爲族姪雨峯作云
身侵古苔色而作老松鱗贈王藝村歸里云抱孫看松月
聽鶴唳秋烟晚歸西村云樹鴉驚杖影鄰犬識吟聲六十
九歲生日作云寡交省酌應隨分得平安贈郭西江云曙

色海天近雁聲林屋秋贈謝稼亭云樹隱隔溪寺雲平當
戶峯冬日過杜君輔云竹高晴雪墜厨靜午烟遲又坐久
鄰翁怪談深爐火知過龔村里居云傍溪開藥徑綠壁掛
詩瓢七十生日云得醉心知足好遊身厭肥又力衰新覺
懶吟苦未知非先生嗣君春如觀察澤長官吾聞與陳少
香先生友善余從少香先生處得其未刊詩藁云

閩縣龔海峯先生

景瀚

題涂曉村強恕圖云居安須念世多

故出險莫忘人向隅二語可以深長思矣圖繪兩舟遇風
一順一逆大旨謂失意之時當泯怨尤得意之時勿忘患
難所謂強恕也我輩處世之方不當如是耶

寶山毛生甫明經

嶽生

所著休復居詩集五言古頗似王介

甫黃魯直一派其人閩諸古詩堅質峻整尤據集中之勝

近體多語病五言之純者如暑雲千嶂合怪石一舟行陰
潭悶靈雨斷峽走悲風城荒多敗堞險別分門梅寒三
畝宅波動五湖天七言如斜照城荒飛鳥絕秋風江冷遠
山高戰爭事息來漁唱豪傑途窮感暮濤牆缺園堆鄰樹
葉樓高簷礙入城霞萬竹參差雲似海亂山高下雪如潮
文章淡處忘才大毀譽空時與道親萬嶺雲隨潮入海一
天瘴逐雨圍城遠郭江寒烟自淨巉巖木落徑斜通林影
乍疎山影補月光未上水光明生甫未見其人聞其議論
多怪誕者